

**NATIONAL ASSEMBLY OF
SEYCHELLES**

(APPLAUSE)

Tuesday 11th June 2024

The Assembly met at 0900 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab, bonzour nou bann zofisyé Lasanble, bonzour nou piblik ki pe swiv nou.

E en bonzour spesyal pou nou bann viziter ki dan Galeri ki en group zabitan Point Larue. E Onorab Conrad Gabriel, Manm pou Point Larue in demann mon laparol pou donn zot en byenveni. Onorab.

HON CONRAD GABRIEL

Mersi Mr Speaker. Mon dir bonzour tou Manm Lasanble e tou dimoun a lekout.

En *welcome* spesyal bann zabitan sorti Point Larue, fer mwan en gran privilez pou akey zot ozordi dan *Chamber* e mon swete zot a pas en moman agreab dan nou konpannyen dan nou *Chamber*. Mersi Mr Speaker.

MR SPEAKER

Mersi Onorab.

MR SPEAKER

Madanm reporter i ava apel Minis e delegasyon pou *Private Notice Question*.

Bonzour *Designated Minister*, Mr Jean François Ferrari e bonzour *Brigadier Michael Rosette* e tou lede byenveni dan Lasanble pou partisip dan *Private Notice Question*. Nou a pran *Private Notice Question*, Onorab Pillay ou a met ou kestyon silvouple.

HON SEBASTIEN PILLAY

Mersi Mr Speaker. Bonzour tou bann dimoun ki pe swiv Lasanble Nasional. Bonzour tou koleg Onorab, bonzour tou bann dimoun ki dan Galeri. Byenveni dan Lasanble Minis Dezinyen avek *Brigadier Leopold*, ah sorry *Brigadier Michael Rosette*.

(Interruption)

MR SPEAKER

Kontinyen Onorab.

HON SEBASTIEN PILLAY

Arwi, zot malelve Mr Speaker, sa bann Manm.

MR SPEAKER

Onorab, komanter i napa plas la, ou kestyon silvouple.

HON SEBASTIEN PILLAY

Mersi Mr Speaker. Mon kestyon pou Gouvernman i lir koumsa, ki pe ganny reponn par Minis Dezinyen lo lapar Prezidan Larepublik.

Eski Minis i kapab konfirmen si i annan en sirkiler ki pe anpes bann manm Lafors Defans partisip dan okenn aktivite politik menm dan zot letan lwazir e eski sa pa pe al kont zot Drwa Konstitisyonnel anba Lartik 23 nou Konstitisyon?

E pou referans Lasanble Lartik..

MR SPEAKER

Ou kestyon in ganny poze, mersi. Minis ou a reponn kestyon silvouple.

DESIGNATED MINISTER JEAN-FRANCOIS FERRARI

Mersi Mr Speaker. Mersi Onorab. Bonzour tou bann Manm Onorab e tou bann oditer ki a lekout.

Mr Speaker, mon ti a kapab ganny ou sipor en pti pe, akoz militer i fer sorti diferan sirkiler pou diferan rezon ki ganny adrese avek bann zofisyen pou donn lenformasyon bann solda. Donk i annan bokou sirkiler ki ganny *issued*.

Onorab *Leader*
Lopozisyon in demann en kestyon ki paret ki i pa tro kler si, ki sirkiler ki i pe demande.

Eski Onorab i kapab dir mwan ki sirkiler ki i pe koz lo la, donn en pe presizyon dan en fason ki mon kapab reponn en pe pli presizeman e nou ava pe koz menm langaz.

Akoz i annan plizyer sirkiler. So, mon pa konnen si ou anvi fer en presizyon *at this point* Onorab. Mersi Mr Speaker.

MR SPEAKER

Mersi Minis. *Ok*, mon a permet Onorab Pillay donn presizyon si i annan.

HON SEBASTIEN PILLAY

Mersi Mr Speaker. Ou pa'n oule les mwan donn presizyon lo Lartik 23 Konstitisyon be ler Minis i demande....

MR SPEAKER

Onorab! Onorab eski ou annan presizyon lo ki sirkiler?

HON SEBASTIEN PILLAY

Mr Speaker mon kestyon i kler. *Ok*. Eski i annan en sirkiler? Mon vwar i drol ki en Minis in vin dan Lasanble i pa pe kapab reponn kestyon.

MR SPEAKER

Bon. Bon si napa presizyon lo sirkiler, Minis ou ava reponn kestyon mannyer in ganny demande silvouple.

DESIGNATED MINISTER JEAN-FRANCOIS FERRARI

Mersi Mr Speaker. Mr Speaker, mon ti a kontan partaz avek Lasanble ki in annan en kantite transformasyon ki'n arive dan Lafors Militer isi Sesel sa bann dernyen lannen.

Premyerman nou solda in sorti koman Solda Rene pou vin Solda Larepublik Seselwa.

(APPLAUSE)

**DESIGNATED MINISTER
JEAN-FRANCOIS FERRARI**

Non, nou Lafors Militer in sorti *SPDF* pou vin *SDF*, *Seychelles Defense Forces* e senbol sa lafors nepli annan 5 Zen lo la parey sa enn avan, me enn ki reflekte nou lafors aeryen, lo later ek lo lanmer.

Letan nou solda i fer parad ou pou nepli tann zot pe kriy viv France Albert Rene e zot pe mars parey bann solda normal, pa parey bann ki sorti Nor Koree me fer keksoz avek bokou loner ek dinyite.

Tousala pa'n arriv zis koumsanmenm Mr Speaker e atraver bann lannen in annan bokou travay ki'n ganny fer politikman pou met en lespri profesyonnel dan nou bann zomn ek fanm dan liniform e mwan mon enn dan bann dimoun e avek mon bann koleg dan Lasanble Nasyonal, ler nou ti pe ankouraze pour ki i annan sa transformasyon pour ki nou ganny nou en

Lafors Militer ki lwayal e ki endepandan.

Atraver sa nou'n reisi sorti dan sityasyon kot solda ti ganny lord pou egzekit Seselwa pou vin bann solda ki fer- pou aprezan vin bann solda ki fer lafyerte nou pei.

Nou'n kapab pas dan en premye tranzisyon politik san ki i annan okenn bal ki'n pete. Ankor enn fwa pou dir ki tousala in ariv akoz bokou dimoun in travay dir e bokou sa bann zefor in ganny fer par bann militer zot menm e sa in ganny met lentere nasyonal premye pour ki sa transformasyon i arive.

Konmsi mon ti a kontan fer sa refleksyon ki mannyer i gou pou vvar ki ler Wavel Ramkalawan i vin Prezidan napa en sel solda ki ganny pouse me zot ganny ankouraze pou servi zot pei dan lendepandans, dan respe e lenparsyalite.

Me i pa'n toultan koumsa, apre retour miltiparti dan nou militer solda dan nou militer ki ti kontinyen pou en pe letan azir konmsi zot la pou protez Albert Rene e dan parad bann lanmizik, bann keksoz koumsa in kontinyen. Ozordi sa bann letan in fini Mr Speaker e sak zomn ek fanm i salye nou paviyon e resevwar respe ki zot merite.

Mon krwar i en moman pou nou felisit nou militer pou

sa bon travay ki zot pe fer. 2 zour pase zot in reisir aret plis ki 800 pros 900 kilo drog ki pe antre dan nou pei e ki pe detri lavi nou bann zenn, sa i en keksoz ki nou bezwen felisit zot.

(APPLAUSE)

DESIGNATED MINISTER
JEAN-FRANCOIS FERRARI

Zot in osi yer aret ankor en lot bato ki ti pe fer lapes ilegal dan nou lanmer, zot in aret bann pirat Somalyen sa lannen.

Alors Mr Speaker, mwan mon aplodir bann travay ki bann militer pe fer pou lentere nasyonal e mon swet Brigadye Rosette ki la dan bor nou en bon kouraz dan sa travay.

Prezan mon ava donn Lasanble en istorik sa parkour ki anmenn nou kot nou ete ozordi. Le 29 Me 2015, premye sirkiler mon mazinen kekfwa se sa enn ki Onorab pe fer referans avek me i annan plizyer lezot ankor. Le 29 Me 2015, 2015 premye sirkiler lo size manm Lafors Defans e zot relasyon avek politik ti ganny pibliye pou tou militer e sa ti ganny pibliye par Brigadye Leopold Payet.

Sa letan sete Mr James Michel ki ti Komandan Sef Lafors Militer e Prezidan Larepublik. La, sa ki sa sirkiler ti dir. Sa sirkiler...

MR SPEAKER

Bann manm gard komanter pou pli tar ler zot koze silvouple. Onorab, sorry Onorab Vidot ou napa drwa reponn mwan mon pe demann ou pou *apologise* deswit la, Onorab Vidot.

HON AUDREY VIDOT

...off mic...

MR SPEAKER

Mersi. E pa fer li ankor. Minis eskiz sa enteripsyon kontinyen silvouple.

DESIGNATED MINISTER
JEAN-FRANCOIS FERRARI

Wi, alors mon ti a zis kontan lir 2 laliny dan sa sirkiler ki ti ganny pibliye an 2015.

'In the run up to the general elections may I remind all service personnel that they are subject to rules regarding their involvement in political activities, such that may imply approval or endorsement of certain political candidates as per se partisanship could undermined the legitimacy of the SPDF'.

I kontinyen pou dir e pou demann pou fer remarke avek bann manm Lafors Defans ki zot in *swear allegiance to the Republic of Seychelles*.

Donk sa ti an 2015 e mon mazinen mon ava les Onorab Leader Lopozisyon ki sa letan i ti en MNA dan Lasanble an

2015 ki poudir nou si i krwar poudir sa ti abiz drwa Konstitisyonnel bann solda akoz sa lepok i pa ti fer okenn komanter lo la.

E donk an menm tan si vreman i ti abiz drwa bann manm Lafors Defans, ki li in fer pou defann sa bann drwa sa bann solda ki dapre li ti kont Lartik 23 nou Konstitisyon? Donk i ava ganny kekfwa loportinite pli boner pou li fer sa.

Le 1 Septanm 2020, donk 5an apre Mr Speaker, Kolonnel Rosette ki la parmi nou dan son kapasite koman *Chief of Staff* anba Kolonnel Roseline ki ti *CDF* e Prezidan Danny Faure Komandan Sef ti fer sorti en sirkiler pou enform tou manm Lafors Defans pou swiv *Code of Conduct* etablier par Komisyon Elektoral pou elekson ki ti pou fer le 22 ziska le 24 Oktob 2020.

Dan rules and regulations manual SPDF ankor enn fwa tou Zofisyen Militer i ganny averti pou konport zot dan en fason ki pa abes lafors me o kontrer pou donn li lafyerte. Tou sa bann regilasyon i ankor pe ganny enplimante ozordi.

Finalman le 3 Zen 2024 Brigader Rosette ti fer sorti en sirkiler similer ki ti repran konteni sirkiler le 29 Me 2015 pou fer tou manm Lafors Defans mazinen ki zot devret

reste enparsyal e pa les zot ganny antrennen pou partisip dan okenn aktivite politik.

La sa ki sa sirkiler i dir. ‘Commanding Officers of all units are reminded’ non sa i 2020 sa sorry.

2024. ‘Reference is made to circular HP 5511CORR dated 29th May 2015, in the run up to the upcoming general elections which date has already been announced, service personnel are reminded of their obligation to adhere to regulations and code of conduct governing their involvement in political activities’

E la Brigadye i donn serten lendikasyon kisia sa bann endorsement oubyen bann, anything that can be perceived at partisanship and e i demann tou bann Unit Commanding Officers e sak officers to bring the content of the circular to the attention of all service personnel.

Donk sa se Brigadye Rosette ki'n fer sorti le 3 Zen donk semenn pase.

Alors Mr Speaker, mon anvi sinyale, mon anvi met lanfaz lo lefe ki sa bann sirkiler i ganny pibliye e i ganny sirkile sak fwa elekson i ganny anonse e i pe vini. Zis koman en reminder pou fer sir ki elekson i deroul dan en bon fason parey in deroule sa bann detrwa dernyen lannen.

Alors, mon ti a kontan envit Onorab Pillay, Onorab *Leader* Lopozisyon pou lir byen Lartik 23 Konstitisyon. Spesyalman seksyon 23(2) (d) 2 (II) ki koz lo restriksyon lo manm Lafors Defans discipliner ki prensipalman Lapolis ek Lafors Defans.

Mon pe rode. '*Right to participate. Right of assembly and association. Every person has a right to freedom and peaceful assembly. The right may be subject to such Regulations as may be prescribed by a law on public officers or members of the. For imposition of restrictions on persons who are not citizen of Seychelles and on persons, on public officers or members of the disciplinary forces*'.

Donk sa i deza dan Lalwa e donk Brigadye Rosette e son bann predeseser in senpleman swiv Konstitisyon.

Sa i montre ou klerman Mr Speaker, ki nou'n vwar en gran evolisyon kot ou koman en zournalis ou ti ganny arete mon rapel devan Biro Parti Demokratik e ganny mete dan en *jeep* larme pou ganny met dan kaso Kordgard Santral. Ou *camera* tou ou bann keksoz to ganny sezi.

SDF aprezan nepli fer sa bann keksoz koumsa, i ganny tou respe e nou annan en lafors profesyonnel ki fer nou

pei e pa zis nou pei me larezyon e lemonn fyer.

Kestyon final ki mon poze se eski Onorab *Leader* Lopozisyon i anvi ki nou retourne aryer e fer nou Lafors Defans fer komans rekomans fer dimoun disparet e touy dimoun parey *TRNUC* in montre e nou'n vwar solda pe demann pardon apre?

An tou ka nou dan *LDS* nou dir non, e personn pa pou ganny trouve mor anba en pon parey en serten Parti Politik son sef pe reve i kontan dir sa e i pe reve pou mont *State House*. Me mon krwar pa nou devret retourne dan sa bann lepok koumsa, nou devret mars *annavans* dan respe dan dinyite e dan lafyerte. Mersi Mr Speaker.

(APPLAUSE)

MR SPEAKER

Bon mon a fer en lapel pou bann Manm, gard zot bann komanter letan zot pe poz zot kestyon. *PNQ* in tant pou al en pe an dezord resaman, mon ti a demann tou dimoun pou fer sir ki i reste annord.

Mon annan Manm tou lede kote ki'n lev lanmen alor mon a pran enn sak kote a tour. Premye, Onorab Lemiel. Ou annan siplemanter?

HON SYLVANNE LEMIEL

Mersi Mr Speaker. Bonzour Mr Speaker, Minis avek Brigadye. Tou bann dimoun Point Larue ki la dan nou Galeri bonzour e mon bann koleg Manm Onorab osi bonzour.

Mr Speaker, mon kestyon pou Minis Dezinyen i se ki, eski Minis dan tou sa ki ou'n eksplik nou eski ou pe dir avek nou ki Solda Lafors Defans Sesel pa kapab al en *rally* oubyen okenn aktivite politik dan zot letan lwazir e eski travayer servis piblik osi pa kapab partisip dan okenn aktivite politik san ganny kriye e kestyionnen par zot siperyer? Mersi.

MR SPEAKER

Mersi. Dezyenm kestyon i lo *civil service*. si, wi.

(APPLAUSE)

MR SPEAKER

Onorab, wi mon rekonnet ki Manm i kapab demann Minis kestyon lo size ki in leve dan son repons. So, mon pou les sa a diskresyon Minis si ou'n adres sa size nou espekte ganny en larepons lo la. Minis ou annan kestyon Onorab Lemiel.

DESIGNATED MINISTER JEAN-FRANCOIS FERRARI

Mersi Mr Speaker. Mr Speaker, anba *Defense Forces Act* i kler ki *any member of a*

regular force is deemed to be on duty at all times, at all times sa se *Defense Forces Act* cap-under definitions meaning of duty, ok.

So, en solda is deemed to be on duty at all times e se pour sa ki lenstriksyon ki bann zofisyen komann Lafors Defans i donnent, se ki si ou on duty at all times, ou kapab ganny kriye at all times evite partisip dan bann aktivite politik menm an deor ou travay ler ou dan liniform, sirtou ler ou dan liniform ou pa devret pe fer.

Alors reste ou, annan ou lopinyon politik, al vote, fer ou devwar koman en sitwayen me selman konport ou koman en dimoun ki endependan e ki pare pou zot, pou li donn lasistans nenport Seselwa pe enport son relasyon, son afilyasyon politik.

Lide deryer sa se ki pou elev standar e pour fer sir ki tou solda i ganny byen respekte par tou dimoun dan tou kote politik. Mersi.

MR SPEAKER

Mersi Minis. Onorab Henrie ou kestyon.

HON GERVAIS HENRIE

Mersi Mr Speaker. Mr Speaker, baze lo larepons ki Minis in donn nou.

Eski ou pe konfirmen ki i annan en zefor nasyonal pou

transform nou Lafors Defans e fer li vin en lorganizasyon ki ganny vwar koman endependan, enparsyal, *apolitical*. Ki servi nenport parti politik ki vin o pouvwar e ki alor Lepep Seselwa i kapab kont lo zot ki zot pou *neutral* dan size politik e ki nou pei pou toulstan anpe e pa zanmen per nou lafors arme ki zis zot ki avek zarm e ki kapab ganny servi pou rezon politik kont en kote ouswa en lot?

Mersi. Eski sa i en transformasyon ki pe ganny fer? Mersi.

MR SPEAKER

Mersi Onorab. Minis ou repons.

DESIGNATED MINISTER JEAN-FRANCOIS FERRARI

Wi. Mr Speaker, mon ti a kontan fer en koreksyon lo sa ki Onorab in dir, Onorab in demande si nou krwar ki Lafors Defans i devret servi tou bann parti politik ki ariv o pouvwar.

Mon larepons lo la se ki non i pa devret, i devret servi sa Gouvernman, sa ladministrasyon ki la. De ki nou bezwen regard kote politik i afekte lendepandans e lenparysalite bann zofisyen bann solda dan liniform.

Alors wi, sertennman i en zefor, i en zefor e nou, nou konvenki poudir nou pou reisi

e deza nou pe vwar bann fri la reisit dan sa travay kot limaz, zimaz piblik ki Lafors Defans i annan dan Sesel in vreman en bon limaz, in vreman ganny eleve a en nivo eksepsyonnal.

E napa lot keksoz pou fer ki pou kontinyen. Akoz pou ou fer progre ou pa devret aret dan semen, pou kontinyen ankouraze e kontinyen fer e pran bann desizyon ki respekte lendepandans e lenparysalite Lafors Defans. Donn zot sa respe ki zot merite e nou demokrasi i ava vin pli for e nou pei i ava en pli bon pei pou viv ladan. Mersi Onorab.

MR SPEAKER

Mersi Minis. Onorab Cosgrow, ou kestyon.

HON WALLACE COSGROW

Mersi Mr Speaker. Bonzour tou dimoun espesyalman bann dimoun dan Galeri, zabitan Point Larue ki pe ekout nou e regard nou sesyon ozordi bomaten.

Mr Speaker, Minis ki devan nou i en Minis ki'n pres sanzman, nesesite pou annan sanzman e Minis in dir nou dan son larepons ki sa sirkiler ti sorti premye fwa an 2015 e ki apre zot in ranforsi lo sa sirkiler.

So alors, Minis vi ki ou en dimoun ki'n toulstan pres sanzman eski ou pe konfirm

avek Lasanble ek pep Seselwa ki sa ki ti ganny fer par Prezidan Michel e 2015 ti korek e ou tonm dakor avek e preznan ou pe ranforsi li?

Akoz depi eleksyon 2020 i annan en kantite solda ki'n partisip dan *rally*, dan programm Prezidan pou son lan in fer temwannyaz.

Akoz an 2020 ler zot ti vin o pouvwar zot pa ti tir sa sirkiler pou *remind* solda ki'n vin zot *rally* ki'n fer temwannyaz pou Prezidan e ozordi zot vvar li i neseser pou fer sa sirkiler? Eski akoz solda in vin *rally US*? Se sa zot problem? Mersi bokou.

(APPLAUSE)

MR SPEAKER

Mersi Onorab. Minis ou repons.

DESIGNATED MINISTER **JEAN-FRANCOIS FERRARI**

Mersi Mr Speaker. Mr Speaker, mon krwar ki kekfwa Onorab pa'n konpran byen lentansyon larepons ki nou'n fer. Sa ki premyerman sa ki Brigadye Leopold Payet in fer, sa sirkiler personnelman e mon pou koz pou tou mon koleg ti en bon sirkiler.

Pa akoz i apel Brigadye Leopold Payet ki tou sa ki in fer i mal, sa ti en bon keksoz e sa ki bon nou garde, sa ki pa bon nou sanze ok.

(APPLAUSE)

DESIGNATED MINISTER **JEAN-FRANCOIS FERRARI**

I annan, nou pe al ganny 50an lendepandans, nou pe al ganny 50an lendepandans e i pa kapab sak fwa pou annan en Gouvernman ki pou sanze, en ladministrasyon pou sanze nou pou zet tou keksoz ki sa enn oparavan in fer. Non, i annan serten keksoz ki byen e nou pou kontinyen apiye.

E dan ka sa kestyon Onorab, napa okenn rezon pou nou sanz okenn keksoz e mwan mon ti a zis kontan dir ki mon deplor, mon deplor sa lenvitasyon ki ou e fer pou envit bann solda dan Lafors Defans pou vin asiste bann *rally* politik. Mon deplor sa akoz i al kont bann regilasyon e i *undermined* kredibilite Lafors Defans e mon krwar ou devret retire sa alegasyon. Mersi.

MR SPEAKER

Mersi.

(Interruption)

MR SPEAKER

Mon pa, non. Onorab! Onorab! Ou'n demann ou kestyon, in ganny reponn. Onorab John Hoareau ou kestyon.

HON JOHN HOAREAU

Mersi Mr Speaker. Bonzour Mr...

(*Interruption*)

MR SPEAKER

Rekomanse silvoupe. Ale.

HON JOHN HOAREAU

Bonzour Mr Speaker. Bonzour Minis ek Brigadye. Bonzour tou dimoun a lekout.

Mon kestyion i koumsa, eski Minis i kapab konfirmen si i en norm dan bann pei demokratik dan lemonn ki solda i montre son afilyasyon politik ouvertman e ki sa demann ki *Leader Minoriter* pe fer, si pa i pou anmenn en sirkonstans kot solda son alizyans pou avek en parti oubyen avek en dimoun olye avek Konstitisyon pei e lanasyon parey in leka dan lepase? Mersi.

MR SPEAKER

Mersi. Minis ou repons.

DESIGNATED MINISTER JEAN-FRANCOIS FERRARI

Mersi Mr Speaker. Mr Speaker, i sa pratik ki nou pe fer, ki nou ti a kontan vwar pe devlope Sesel i en pratik ki ganny swiv dan tou bann pei demokratik. Kot i annan demokrasi i annan en separasyon ant politik avek militer e nou'n vwar dan bann pei kot napa sa separasyon ou

ganny bann lenterferans politik e nou'n vwar dan bokou plizer pei Lafrik, plizer pei Lanmerik *Du Sud*, Lanmerik *Latin* nou'n vwar sa bann sityasyon koumsa.

Alors wi e nou koman en pei *Commonwealth* nou swiv bokou bann standar ki ganny mete par Langeter e Langeter i zot, *La Grande-Bretagne* zot ankouraz fortman partisipasyon tou bann manm Lafors Defans e tou bann lafors disipliner dan eleksyon e pou pran zot responsabilite.

Me selman zot dekouraz, parey nou zot dekouraz bann partisipasyon dan bann *rally* politik dan bann met liniform dan bann *endorsement* piblik bann politisyen, akoz sa i anmenn kritik lo lafors e i pa servi en bon mezir pou asir sekirite pei e sekirite bann sitwayen. Mersi.

MR SPEAKER

Mersi Minis. Onorab Loze ou kestyion.

HON JOHAN LOZE

Mersi Mr Speaker. Mr Speaker, nou bezwen fer sorti ki diran *rally LDS* Anse Royale solda ki ti dan zot ler travay pe protez Prezidan ti dan triko *LDS* lo laplenn dan *rally*.

(*Interruption*)

MR SPEAKER

Order! Order! Silvouple, silvouple ou annan loportunite pou demann ou kestyon demann ou kestyon ler i arriv ou trou. Ok Onorab, ou'n met en fraz mon sipoze i pou etablir konteks pou ou kestyon, prosed avek ou kestyon prezan.

HON JOHAN LOZE

Mr Speaker dan programm 100 zour Prezidan osi manm Lafors Defans ti koze pou *endorse* Prezidan Ramkalawan. Now, mon oule pran *timeline* sa bann sirkiler, Minis in koz lo en sirkiler ki'n sorti 2015, lo en sirkiler ki'n sorti 2020 e la sirkiler ki'n sorti apre *rally United Seychelles*.

Brigadye mon kestyon, 2015 ti annan en sirkiler ki li i ti annan *connotation* politik, 2020 ou ti fer sorti en lot sirkiler ki ti koz lo *rules established by the Electoral Commission*, kot klerman nou ti pe evolye nou demokrasi pli devan, sa se ki Minis in dir nou bomaten.

10an pli tar Brigadye ou retourne ankor lo sa sirkiler 2015, ou re vizit li, *rehash* li e fer li retournen. E ou inyor konpletman sa sirkiler ki ou ti fer sorti 2020 ki li i ti pe koz lo *rules established by the Electoral Commission* ki ti pe fer avanse nou demokrasi devan.

Akoz Brigadier ou'n santi nesesite la le 3 Zen apre *rally US* ki'n fer le 26 Me pou nou retourne lo Polisi e politik Prezidan Michel? Mersi Mr Speaker.

(APPLAUSE)

MR SPEAKER

Mersi Onorab. Minis kestyon i dan ou lanmen ou kapab adrese oubyen Brigadye.

DESIGNATED MINISTER JEAN-FRANCOIS FERRARI

Mr Speaker mon pa anvi war ki Brigadye i ganny trennen dan bann deba politik akoz i senbol sa lendepandans ki nou pe swete ki nou pe rode. Donk me selman mon ava permet li si i oule fer en pti presizyon pou li dir en keksoz, si non mon ava reponn.

MR SPEAKER

Mersi. Brigadye ou annan laporan.

BRIGADIER MICHAEL ROSETTE

Bonjour Mr Speaker. Bonjour tou bann Manm Onorab e bonjour bann zabitan Point Larue ki dan Galeri.

Mr Speaker, sa sirkiler 2015 i spesifik, i fer referans pou bann solda ki dan servis militer pou pa partisip dan bann aktivite politik e nou fer *reminder* detanzantan pou

bann solda pou zot konpran sa.

Sa ki Onorab in refer avek ki *Electoral Commission* i fer sorti, ki mwan mon ti fer sorti an 2020 i en dokiman separe. 2 dokiman diferan. Sa enn ki *Electoral Commission* i fer sorti i donn gidans ki mannyer solda i partisip dan eleksyon.

I dir, Lafors Militer pa kapab servi transpor militer pou al vote e bann solda pa ganny drwa met okenn liniform militer pou al vote.

Sa enn ki i ti fer sorti, ki mon'n fer sorti la napa okenn referans avek *rally*. Mon pa oule antre dan deba politik me i en *reminder* pou tou ba nouvo solda ki'n zwenn lafors resaman pou fer zot konpran ki i annan eleksyon pe vini e diran sa peryod i pou annan bann aktivite politik e nou pa pe target okenn parti, nou pe dir zot an zeneral.

Sa sirkiler i zeneral, i zeneral pou tou lezot aktivite politik ki pe vini nou dir zot poudir, zot lobligasyon koman en solda, zot bezwen pa demontre piblikman zot afilyasyon. Sa i anliny avek zot travay koman en lafors disipliner e koman en lafors disipliner bann solda zot in ganny *train*, zot annan en *hierarchy* komann e nou pa oule ki sa i ganny parey nou dir *jeopardise*.

Demen en solda ki'n partisip dan en sereten aktivite, ki'n montre piblikman son afilyasyon ler i antre pou vin travay par ler i annan en lot koleg ki li i annan en lot afilyasyon i pou difisil pou li egzers komann.

E fodre nou konpran ki sa *process* i pa zis avan eleksyon e apre eleksyon. Lafors Defans i la pou asire ki sa prosesis eleksyon, avan eleksyon, apre eleksyon i pas dan en fason trankil, okenn sanzman ki arive i ganny pase dan en fason pasifik. Personn anndan dan lafors pa takin kanmarad akoz zot afilyasyon politik. Napa dezagreman anndan kot nou pou anmenn en dezord anndan dan baz militer ou an deor sivil.

Se sa lide, sa i lide par deryer Konstitisyon ki ti ganny fer e nou apresye ki sa bann *clause* ki ganny mete dan Konstitisyon i donn nou en bon gidans, sirtou sa enn 23 ki mannyer Lafors Defans pou *proceed* dan en peryod eleksyon e apre eleksyon.

E se sa ki'n gid nou pou fer sa bann sirkiler e Komisyen Eleksyon osi i donn nou pou li, ki mannyer parey in dir, ki mannyer bann solda pou al vote. Mersi.

MR SPEAKER

Mersi. Minis oule azoute.

DESIGNATED MINISTER
JEAN-FRANCOIS FERRARI

Wi, mersi Mr Speaker. Mon ti a kontan zis adres sa dernyen bout ki Onorab in koz lo la bann zofisyen Sekirite Prezidan.

Mon krwar nou bezwen aksepte ki en Prezidan ki ganny en *security detail*, ki sorti swa kot lapolis swa kot militer i ganny sa *security detail* 24 lo 24 partou kot i ale e i pa pe anmenn en Zofisyen Sekirite oubyen en Zofisyen Militer dan en *rally*.

Nenport landrwa menm ler Prezidan pe marse, pe vizit en dimoun pou son travay politik i annan sekirite avek li e sa i en norm ki'n ganny aksepte, sir sekirite pa pou Wavel Ramkalawan, pa pou *Leader LDS*, pa pou Sekreter Zeneral en lot parti. I sekirite pou Prezidan Larepublik.

E sa se bann keksoz ki nou bezwen aksepte pou annan a tou moman si i annan sa bann Zofisyen ki dan *t-shirt* mon pa tro krwar, me selman mon aba verifye e kekfwa i en omision. Me selman sekirite Prezidan i toultan ganny atire 24 lo 24 par Lafors Militer. Mersi bokou.

MR SPEAKER

Mersi Minis. Onorab Woodcock ou kestyon.

HON WAVEL WOODCOCK

Mersi Mr Speaker. Mr Speaker mon pou komanse par remersye sa 3 solda lo baz *Coast Guard Praslin* ki ti vin donn nou en koudmen pou netway klinik Sanmdi pase.

Minis eski ou ava dakor avek mwan ki nou bezwen annan en standar dan larne. Kot nou pa anvi return parey keksoz ti ete dan letan parti inik, dan bann letan Albert Rene. Kot larne ti 100poursan politize, kot larne ti ganny servi pou fer per Lopozisyon. Aret dimoun, bat dimoun, touy dimoun. Kot bokou ti *end up* anba rigol parey Mr Herminie dan son *raincoat* ti dir dan enn son bann kongre ki zot to fer.

Eski ou pou dakor avek mon ki nou bezwen etablir en standar dan larne ozordi? Mersi.

MR SPEAKER

Mersi Onorab. Minis repons.

DESIGNATED MINISTER
JEAN-FRANCOIS FERRARI

Mersi Mr Speaker. Mr Speaker- Onorab sa standar zanmen nou arriv lo li 100poursan e alors se pour sa rezon ki nou pa devret zanmen, nou pa devret zanmen aret eseye e aret fer zefor pou nou vin pli meyer.

I annan en konsansis mon mazinen dan pei e apre 50an byento 50an

lendepandans ki nou pei i pour tou son zanfan, i pour tou Seselwa e alors nou annan en Lafors Defans ki protez tou Seselwa.

Donk sa se en parol ki ou pou tann mwan e mon asire mon bann koleg e Prezidan Ramkalawan pe dir toulstan, ki nou bezwen kontinyen met zefor pou fer sir ki napa okenn lenterferans politik e ki nou pa retourn dan bann lannen tris. Dan bann lannen fer lapenn ki nou'n vwar o komansman sa bann, nou bann premye lannen Lendepandans ki ti vreman fer soufer bokou dimoun e la nou pe fer bokou progre.

E ankor enn fwa parey mon'n dir taler, mon envit tou dimoun. Mon envit sirtou bann Manm Onorab dan Lopozisyon pou bouz dan sa bon direksyon, pa bezwen sey retourn nou an aryer. Zot menm zot, zot in dir poudir zot en novo US. Be pa bezwen al dan ansyen US prezan.

Akoz mannyer zot pe ale, si zot pe rod sa bann keksoz ki ansyen, zot pou pri dan ansyen. Mersi Mr Speaker.

(APPLAUSE)

MR SPEAKER

Mersi Minis. Onorab Vidot ou kestyon.

HON AUDREY VIDOT

Mersi Mr Speaker. Bonzour Mr Speaker, tou manm Onorab, Minis avek Brigadye. Bann dimoun dan Galeri e tou dimoun i a lekout.

Minis zot pe kontinyelman viktimiz dimoun dan servis piblik, dan lapolis, dan larme. Dir nou enn fwa pour tou baze lo repons ki ou avek Brigadye in dir, dir nou si sa bann Zofisyen Lafors Defans zot drwa pa pe ganny abize lo zot drwa pou rasanbleman, lasosyasyon e pou zot annan sa lapartenans avek en parti politik?

Parey i ganny dir dan Konstitisyon anba Lartik 23 ki ou, ou pa'n- ou'n omite pou ou dir, dir nou Minis.

MR SPEAKER

Mersi Onorab. Bon Onorab in fer en alegasyon ki nou a inyore. Minis ou a reponn kestyon ki'n ganny poze silvouple.

DESIGNATED MINISTER

JEAN-FRANCOIS FERRARI

Mersi Mr Speaker. Mr Speaker, Onorab ou pe demann mwan la en lopinyon eski mon krwar ki zot pe ganny viktimize oubyen non. Mon pa kapab donn ou en lopinyon, mon bezwen donn ou mon repons baze lo bann fe.

E bann fe se ki mon asire ki si i annan okenn

victimization Brigadye Rosette ki en dimoun onorab e bann dirizan dan Lafors Defans e dan lapolis ava pransa bann alegasyon serye e mon pa'n tandé pou le moman okenn sa bann victimization.

Par kont dan lepok kot ladministrasyon ti lo zot kote ti annan victimization ti annan, nou'n tandé nou'n vwar dan *TRNUC* ki mannyer zot in fer martir dimoun. Me depi en pe letan mon pa ankor, mon'n aret tandé sa bann keksoz koumsa.

Donk mon pa'n vwar, mon pa'n ganny, napa okenn ka ki'n ganny met Ankour okenn Drwa Konstitisyonné. Sirtou nou dan en pei kot tou dimoun i anvi met Gouvernman Ankour, la mon pa'n vwar okenn dimoun ki'n dir okenn manm Lafors Defans ki'n dir poudir son drwa pou li asosye e pou li annan en lopinyon politik in ganny *bafwe* e in ganny victimize. Mon pa'n vwar tousala, sa se bann fe.

Alor tan ki mon pa vwar okenn sa bann laprev, mon bezwen aksepte poudir, e zot, zot bezwen aksepte poudir napa victimization bann *management* Lafors Defans an relasyon avek politik pe ganny fer dapre Konstitisyón e dapre tou bann regilasyon e dapre *Defence Forces Act*. Mersi.

MR SPEAKER

Mersi Minis. Onorab Mondon ou kestyon.

HON TERENCE MONDON

Mersi Mr Speaker. Bonzour Minis e bonzour Brigadye. Mr Speaker lenformasyon militér i sansib e konsekan, i devret ganny garde dan tou konfidansyalite. Ki Lafors Defans pe fer an plis pou adres sa size konfidansyalite? Mersi Mr Speaker.

MR SPEAKER

Minis repons.

DESIGNATED MINISTER JEAN-FRANCOIS FERRARI

Brigadye i ava fer komanter.

BRIGADIER MICHAEL ROSETTE

Mersi Onorab pou ou kestyon. Mon krwar militér nou servi en sistem klasifikasiyon lo tou nou bann dokiman enkli bann ki *unclassified*, bann ki *confidential*, *secret*, *top secret* sa i bann prosedir.

Nou vwar i ankor annan *leakage* bann dokiman e i malere e sa i en lofans. Sa ki ganny atrape pe sirkil dokiman ki ganny klasifiye *Defence Forces Act* anba son *Offences Act* i fer provizyon pou pran aksyon avek zot. E si sa i arive, i ganny dekouver, en *Board of Investigation* i ava ganny ouver e bann prosedir i

ava ganny pran pou ganny zize. Mersi.

(laughter)

MR SPEAKER

Mersi. Nou pe *run out of time*. Mon pou pran ankor en kestyon e sa se kestyon Onorab Uranie, apre nou pou pas lo kestyon *Leader Lopozisyon*. Mon pa pe pran ankor kestyon siplemanter. Onorab Uranie ou kestyon.

HON ROCKY URANIE

Mersi Mr Speaker. Bonzour VP, bonzour Brigadye e bonzour tou bann zabitan Point Larue ki dan.

Bonzour Minis Dezinyen e bonzour tou dimoun Point Larue ki dan Galeri. Wi ti devret VP li, akoz lontan i la.

(Interruption)

HON ROCKY URANIE

Wi, mersi mon kestyon. Eski i akoz plizyer solda i mekontan avek sa Gouvernman ki zot in vin *rally US* ki ou e Prezidan mon kapab dir in fors Brigadye pou fer sorti en pe irzan sa sirkiler? Mersi.

MR SPEAKER

Mersi. Minis ou repons.

DESIGNATED MINISTER JEAN-FRANCOIS FERRARI

Mon repons se non.

MR SPEAKER

Mersi. Onorab Pillay ou a poz ou bann siplemanter silvouple.

HON SEBASTIEN PILLAY

Mersi Mr Speaker. E ankor enn fwa bonzour tou dimoun, tou Seselwa, tou solda, Zofisyen dan lafors, tou *public servant* ki pe swiv nou. Zot in tande, zot in ekoute, zot ava fer zot prop konklizyon, zot prop analiz.

Mr Speaker mon oule zis met lo rikord en keksoz avan mon komanse se ki sel dimoun la anndan ki'n pran par dan koudeta e tyonbo fizi, i ti al rod Davidson Chang-Him se Minis Ferrari, se li.

(APPLAUSE)

HON SEBASTIEN PILLAY

Ok, preznan Mr Speaker annouvin lo sa kestyon sirkiler *ok*. An 2015 ler sa sirkiler ti sorti premye pou konplent sete Prezidan Ramkalawan li menm ki ti dan Lasanble sa letan e son Minis- e Minis Ferrari ki ti *Chief Whip* sa letan. Premye pou konplent sete zot de, mon ti dan Lasanble mwan. Premye pou konplent sa sirkiler.

An 2020 sa sirkiler pa ti ganny sorti akoz Gouvernman

(APPLAUSE)

ti per pou fer sorti sa sirkiler
ok.

(*Interruption*)

MR SPEAKER

Order! Bann Manm LDS silvouple. Onorab Henrie, Onorab Georges silvouple gard lord ziska zot in ariv ler.

HON SEBASTIEN PILLAY

Mr Speaker mon a kontinyen?

MR SPEAKER

Onorab Pillay wi.

HON SEBASTIEN PILLAY

An 2016 ler Prezidan ti vin dan Lasanble i ti premye dimoun pou konplent sa bann sirkiler e zot parti ti premye pou pibliy plan baz *coast guard* ki ti sorti kot larme.

Now 2015 sirkiler i sorti, 2020 en eleksyon, pa ti vvar li neseser pou pibliy sa sirkiler e 2020 suddenly nou ganny dir poudir nou bezwen anvoy en *reminder* e nou ganny dir poudir okenn sa bann solda ki'n dan triko pa'n zanmen dan triko, okenn sa bann solda ki'n dan *rally* pa'n zanmen dan *rally*.

La mwan mon annan en portre lasal a manze lekol Au Cap kot nou dir pa fer politik dan lekol. Dan sa portre i annan ou menm Mr Speaker ki pe asize, ou annan Prezidan, ou annan MNA Au

Cap, ou annan bann Zofisyen deryer dan triko....

(*Interruption*)

MR SPEAKER

Silvouple! Ankor enn fwa Onorab, bann Onorab LDS. Silvouple gard lord, montre legzanp.

Wi Onorab prosede pa fer ou diskour tro long ariv lo ou kestyon.

HON SEBASTIEN PILLAY

Mersi Mr Speaker. Non, Mr Speaker mon pe montre levidans ki mannyer nou, nou pe ganny akize koman nou oule politiz keksoz me le sel group dimoun ki fer politik nou vvar bann Zofisyen deryer dan triko, nou vvar ou Mr Speaker.

(*Interruption*)

MR SPEAKER

Order! Silvouple! Onorab mon realize. Mon realize ki Minis in adres size partisipasyon dan politik, selman kestyon ti an relasyon avek Lafors Militer e lafors. so ou'n fer sa komanter ok, silvouple ok.

HON SEBASTIEN PILLAY

Non mon pe zis montre levidans pou ilistre mon pwen pou met sa laba pou montre poudir.

MR SPEAKER

Prezan pas lo ou kestyon.

HON SEBASTIEN PILLAY

Pou montre poudir ou ek ou Komite Zeneral, mon pa konnen. Prezidan, ou, Leader LDS ou'n dan en lekol pe fer politik kan nou pa sipoze fer.

MR SPEAKER

Pas lo kestyon.

HON SEBASTIEN PILLAY

Nou osi nou'n vvar sa sirkiler ganny sirkile an sa ki konsern bann solda. Nou'n osi ganny konplent *from* bann solda ki ti dan *rally* ki'n ganny kriye, ki in ganny kriye zis apre ki zot sorti dan *rally* pou zot ganny zize akoz zot in *attend rally* e deswit sa sirkiler in sorti Mr Speaker.

So, kestyon ki mwan mon annan pou Minis. Ou, ou'n deza dir poudir 70poursan gard i LDS.

**DESIGNATED MINISTER
JEAN-FRANCOIS FERRARI**

Mwan?

HON SEBASTIEN PILLAY

Yes, dan *carpark* kot IDC.

**DESIGNATED MINISTER
JEAN-FRANCOIS FERRARI**

Be non.

HON SEBASTIEN PILLAY

Ok ou'n deza dir sa ou, ok. Ou, ou annan drwa dir poudir gard e larme i ganny drwa annan afilyasyon politik me sa bann pov solda, sa bann pov gard zot, zot pa ganny drwa annan zot prop afilyasyon politik menm ler zot pa dan zot liniform.

*So, nou retourn kestyon pou Minis eski bann solda, eski bann Zofisyen Lapolis e in menm entrodwir Travayer Servis Piblik. Eski bann travayer servis piblik ki vin en *rally* Lopozisyon, eski zot pou ganny zize, eski zot pou ganny viktimize, eski zot pou ganny kriye pou zot ganny dir pa bezwen fer?*

E mon dezyenm kestyon Mr Speaker, an relasyon ek tou sa ki in dir nou. Li i dir ek nou koumsa poudir be napa solda ki'n pran par dan okenn aktivite depi 2020, *ok* be sa ki nou'n vvar Mr Speaker se ki in annan solda ki'n koz lo 1an Prezidan, politikman.

Bodyguard Prezidan ki en Kaptenn, ki sipoze donn lord lezot solda i ouvertman kapab montre son afilyasyon politik Mr Speaker. Me selman, selman Brigadye i dir nou sa pou afekte ler en dimoun i...

(Interruption)

MR SPEAKER

Poz.

(Interruption)

MR SPEAKER

Order! Onorab poz ou kestyon.

(Interruption)

MR SPEAKER

Yes Onorab. Poz ou kestyon.

HON SEBASTIEN PILLAY

Mersi Mr Speaker. Ou koman Speaker Lasanble Nasyonal ou annan drwa *attend*.

**DESIGNATED MINISTER
JEAN-FRANCOIS FERRARI**

Poz ou kestyon.

(Interruption)

MR SPEAKER

Order! Minis a reponn kestyon ki'n ganny poze e nou a termin sa sesyon kestyon. Minis ou repons.

**DESIGNATED MINISTER
JEAN-FRANCOIS FERRARI**

Mersi. La prezan, ou pa devret pe riye, *anyway* Mr Speaker mon larepons i koumsa.

Onorab *Leader Lopozisyon* in demande si i annan bann dimoun ki dan militer ki dan lapolis oubyen ki dan servis piblik ki ganny trouve pe partisip dan en *rally* politik, eski zot pou ganny zize. Larepons se non, zot pa pou ganny zize.

Sa ki enportan se ki si i annan bann manm Lafors Defans ki ouvertman partisip dan *rally*, dan bann keksoz koumsa zot pou ganny apele e zot pou ganny *reminded* zot dewwar pou gard zot lendepandans ek zot lenparsyalite.

Sa, militer mon asire pou toulstan fer li akoz i dan lentere e mwan respe ki mon annan pou Brigadye Rosette se ki mon konnen i pou toulstan lager e i pou toulstan met tou zefor pou fer sir ki son lafors, sa lafors ki i dirize i en lafors endepandan e emparsyal.

Alors wi, si i annan. Si i annan ki'n partisipe dan bann *rally US* parey zot dir e zot in ganny kriye pou zot ganny *reminded*, i byen si zot in ganny kriye akoz zot pa devret pe partisip...ok.

(APPLAUSE)

**DESIGNATED MINISTER
JEAN-FRANCOIS FERRARI**

Donk mersi bokou pou aksepte sa.

E mwan mon ti a kontan dir an konklyzon ki nou bezwen. Annou rod en fason pou nou tonm dakor lo lendepandans e lo respe e lo en zimaz formidab pou Lafors Defans. Annou tonm dakor, nou pa bezwen akoz nou dan en kote politik, ki ler nou pa dan Gouvernman nou zet tou

keksoz, ler nou dan Gouvernman nou pa zete.

Annou pran sa ki bon e annou bouz devan, annou fer ki nou pei i progrese e mon krwar poudir nou annan en devwar pou nou fer li.

Alors ankor enn fwa mwan mon a demann zot tou ki la donn en lanmen pou sa travay formidab ki Lafors Defans pe fer dan Sesel pou le moman. Mersi bokou.

(APPLAUSE)

MR SPEAKER

Mersi. Mersi Minis. Nou termin sa seksyon kestyon la. Mon remersye Minis ek Brigadye e mon envit zot fer zot depar e bonn kontinyasyon. Mersi Minis.

Bon sesyon *PNQ* in terminen, mon a demann Raporter pou apel lot Minis pou nou kontinyen kestyon.

Mon pa pe pran okenn *Matter of Privilege* Onorab Georges.

(Interruption)

MR SPEAKER

Order!

Alor, bonzour. Minis pou Lazenes Sport e Lafanmir, Mrs Marie-Celine Zialor. Bonzour Mr Marc Arissol, *CEO National Sports Council*. Mrs Rosa Morin, Direkter Zeneral pou *Elderly and Disabled Division* e

Mrs Gyra Nibourette, Direkter Zeneral pou *Strategic and Human Resource* dan sa Minister.

Mersi zot tou pou zwenn nou pou sesyon kestyon ozordi e nou a komans avek premye kestyon 142, Onorab Richard Labrosse.

HON RICHARD LABROSSE

Mersi Mr Speaker. Dabor mon ti a kontan Minis dir ou bonzour ek ou delegasyon. Bonzour tou mon bann koleg, tou dimoun ki a lekout en bonzour spesyal pou nou bann envite sorti La Point Larue.

Mr Speaker, kestyon limero 142 i al *comme swivan*.

Eski Minis pour Lafanmir i kapab enform Lasanble si i annan okenn Lezislasyon konpreansiv pou bann dimoun dezabilite? Si wi, eski i satisfe ki sa Lalwa i azour avek la realite lavi sa group dimoun ozordi? Mersi Mr Speaker.

MR SPEAKER

Mersi Onorab. Minis ou repons silvouple.

MINISTER MARIE-CELINE ZIALOR

Mersi Mr Speaker. Bonzour Mr Speaker. Bonzour sa 2 *Leader* dan Lasanble, bonzour tou bann Manm Onorab, bonzour

bann staff Lasanble e bonzour tou bann dimoun ki a lekout.

Mr Speaker, malerezman ziska prezan Sesel napa okenn Lalwa konpreansif pou ankadre dimoun avek dezabilite. Par kont, dan nou Konstitisyon i annan 2 seksyon, seksyon 27 ki annan provizyon ki endirekteman adres dezabilite e seksyon 36 ki annan provizyon direk ki adres dezabilite.

Mr Speaker, i osi annan bann lezot Lalwa tel koman Lalwa Zanfan, Lalwa Lanplwa, Lalwa Sekirite Sosyal e osi *Penal Code* ki mansyonn osi serten provizyon pou dimoun ki pe viv avek dezabilite.

E Mr Speaker 2enm parti sa kestyon i demande si nou satisfe avek provizyon sa bann Lalwa, larepons se non, nou krwar i pa ase. Se pour sa rezon ki nou'n komans dyalog avek nou bann partner kle lokal osi ki internasyonal pou annan lankadreman pli konpreansiv e spesifik pou sa group dimoun. Ki Departman Lafanmir ler in fini travay lo la Mr Speaker, i ava prezant avek konsey Minis pou laprouvason.

Nou osi okouran ki Lalwa tousel i pa ase, alors nou'n travay pou amelyor lezot servis e prodwir ki sa bann dimoun i bezwen. Par egzanp:- Benefis lasistans sosyal ki'n ogmante kot *ASP*, nou'n retir *tax* lo

lenportasyon lekipman spesyalize pou sa group dimoun, nou'n entrodwir *fast card* pou bann ki bezwen al kot bann sant lasante. Nou'n fek fer aktivite sensibilizasyon pour ki i annan plis akse pou bann dimoun avek dezabilite fizik.

Nou'n siny *MOU* avek *Special Olympics International* pou ganny sipor pou bann dimoun ki annan dezabilite entelektyel. Nou'n inisyé serten donasyon lekipman, parey bann sez spesyalize pou ede avek bann dezabilite fizik ki sever.

E la nou'n fini fer Mr Speaker, renovasyon konpreansiv lo *VTC* e nou pe prepare pou son reouvertir.

Tousala Mr Speaker, i end legzanp lo bann travay ki Departman Lafanmir pe fer e i fer an kolaborasyon ek son bann partner an menm tan ki nou a pe osi regard mankman dan Lezislasyon.

E mon bezwen dir Mr Speaker, partisipasyon Onorab Naddy Zialor dan nou bann demars i enn ki'n tre efektiv sirtou lo kote nasyonal me osi tou lo kote internasyonal. E mwan mon kontan, mon fyer ki nou Gouvernman in donn li sa sans. En dimoun avek dezabilite, ouswa parey Onorab Zialor i apele en

dimoun ki otreman kapab pou kapab.

E Onorab atraver Mr Speaker, mon ti a kontan dir li malgre ou ganny maltrete, malgre ou ganny menase pa dekouraze e ansanm annou kontinyen travay pou nou amelyor kalite lavi nou bann dimoun otreman kapab. Mersi.

(APPLAUSE)

MR SPEAKER

Onorab Labrosse ou siplemanter.

HON RICHARD LABROSSE

Mersi Minis pou ou larepons byen detaye ki ou'n donnent. E Minis mwan mon ti a kontan osi azoute ki la deor osi nou annan en lot group dimoun ki pe fer en travay merveye pou bann dimoun ek dezabilite.

La mon mazin Ms Jourdanne Ernesta avek son lekip, ki zot pe fer sir zot pe tous tou bann dimoun ki dan sa bezwen. Alors ansanm, koumsa ki nou merit pe travay dan lentere pou nou kontinyen fer nou pei mars pli devan.

Minis lo menm laliny osi ki mon ti a kontan, ou'n nonm en pe bann travay ki pe ganny fer e ou'n osi fer Lasanble konpran ki zot napa sa plan an mars an se moman. E mwan mon kestyon i *comme swivan*.

Parey ou'n dir i annan bann travay ki pe ganny fer ek bann partner ki sa i tre byen e nou osi isi dan Lasanble i annan dokiman ki nou'n vwar par egzanp kot Minister kot *Planning* laba zot pe fer bann travay pou fer sir ki bann dezabilite i ganny akse byen sirtou bann ki annan *wheelchair* lo trotwar eksetera.

Minis mwan mon ti a kontan konnen osi ler ou pe koz lo bann partner la, vi ki mon'n nonm ou ankor bann lezot dimoun ki pe fer sa travay. Ki mannyer ou Minister pe ankadre bann lezot dimoun ki pe fer en travay ek bann dezabilite, parey bann lasosyasyon. Parey nou'n dir, ki sosyete civil zot touzour la pou donn en pwen an deor. Kekfwa bann keksoz ki nou, nou pa vwar sa i enn.

E mon 2enm kestyon Minis, ler ou'n dir ki sa Lalwa zot napa en se moman me selman i annan bann travay ki pe ganny fer. Me selman si mon pa'n konpran ou byen, si ou ti kapab refer sorti sa. Eski ler nou pe koze an se moman la ek AG's Office ansanm ek bann partner, i annan en devlopman la ki pe ganny deroule pou fer sir ki i annan en tel Lalwa parey pou protez osi sa bann group dimoun? Mersi Mr Speaker.

MR SPEAKER

Mersi Onorab. Minis ou repons.

MINISTER MARIE-CELINE ZIALOR

Mersi Mr Speaker. Avek ou permisyon mon ti ava kontan ki *DG* Morin i reponn sa 2 kestyon. Mersi.

MR SPEAKER

Mersi. *DG* ou annan laparol.

DG ROSA MORIN

Bonzour Mr Speaker. Bonzour tou bann manm, bonzour tou dimoun a lekout.

Pou premye kestyon wi, divizyon dimoun aze avek dimoun ki annan dezabilite nou travay vreman pros avek bann *NGOs*. Nou toulstan an kontak avek zot pou tou bann aktivite ki zot, zot anvizaze fer e ki zot bezwen nou lasistans nou la.

Zot menm deservi nou *miting room* kot nou pou okenn bann aktivite, pou okenn zot bann miting ki zot anvi fer. E tou bann aktivite kle, ki bann programm ki divizyon nou fer, toulstan sa divizyon nou an konsiltasyon avek bann *NGOs* oubyen bann lorganizasyon ki afilye swa avek dimoun aze, swa avek dimoun dezabilite.

Pou dezyenm kestyon, wi i annan travay ki pe ganny fer. Aktyelman nou ti'n sipoze fer

symposium la Zen, selman ki nou'n *postponed* pou premye semenn Zilyet. Nou annan en gran *symposium* ki pou annan partisipasyon kle reprezantan *Attorney Zeneral* e tou bann lezot lasosyasyon, tou bann *NGOs* ki asosye avek dimoun dezabilite.

Akoz nou oule pou premye fwa re get tou bann Lalwa ki pou kapab *meet* bezwen e drwa sa 2 group dimoun e pandan sa travay apre ki pou ganny fer, la nou ava lo en pli bon fason pou nou konnen ki mannyer ler nou pou prepar nou *Policy* pou nou *submit* kot *Cabinet of Ministers*. Mersi.

MR SPEAKER

Mersi. Mersi *DG*. Onorab Labonte ou kestyon.

HON ANDY LABONTE

Mersi Mr Speaker. Bonzour Minis avek ou *panel*. Mr Speaker, permet mwan pou mon osi felisit Mrs Jourdanne Ernesta ek son lekip e osi Mrs Dianne dan distrik La Rivière Anglaise ki pou plizyer lannen zot pe fer en travay egzanpler anver sa kous popilasyon.

Minis preznan an relasyon avek kestyon lo Lezislasyon pou benn dimoun dezabilite. Parey ou'n reasir nou ki nou Konstitisyon e tou bann Lalwa parey drwa zanfan i osi kouver bann dimoun ki pe viv avek

dezabilite san favoriz okenn kous popilasyon.

E ou'n osi mansyonnen ki – ou'n osi nonm *ASP* dan ou repons. E la mon anvi pran sa lokazyon pou mon felisit Minis Patricia Francourt avek *CEO* Brenda Morin, ki Vandredi le 7 Zen zot in vin enn parmi bann premye Lofis Gouvernman ki'n ouver zot *Customer Care Lofis* ki in donn facilite bann dezabilite, ki en *step further* pou nou bann dimoun ki pe viv ek dezabilite.

(APPLAUSE)

HON ANDY LABONTE

So, mon kestyon i ki bann mekanizm ki annan an plas pou ede protez sa kous popilasyon ler labi lo *allowance* ki sa bann endividé i resevwar pe ganny arive swa dan lakour, swa dan piblik, ki egziste dan kominote. Eski Minister Servis Sosyal i travay kot a kot avek ou Minister pou ede amelyor lavi sa bann endividé? Mersi.

MR SPEAKER

Mersi Onorab. Minis, *DG* pou pran laparol?

DG ROSA MORIN

Mersi pou ou kestyon. Wi pour, lo kote labi nou travay vreman pros avek sosyal e menm avek lapolis.

Zis pou mwan klarifye, nou divizyon dimoun aze avek dezabilite nou manda se pour *advocate* e ledikasyon. E sanmenm sa i enportan ki nou travay avek bann lezot departman, bann lezot lorganizasyon ki zot, zot annan pou zot fer avek lentervansyon.

E en nenport fwa ki nou ganny bann *call oubyen* nou ganny alerte ki i annan. Par egzanp i annan labi. Nou, nou divizyon ansanm toultan nou bezwen ale ansanm avek sosyal avek lapolis tou, nou ganny zot led bokou e ki la nou kapab fer rapor me se sosyal li menm li ki bezwen fer lentervansyon. Mersi.

MR SPEAKER

Mersi *DG*. Onorab Lemiel ou kestyon.

HON SYLVIANNE LEMIEL

Mersi Mr Speaker. Bonzour Minis avek ou delegasyon. Mr Speaker, mon pou demann Minis sa kestyon koman en Manm Parlman Panafriken e Komite ki mon lo la ladan dan sa Parlman i apel *Gender, Family, Youth and People with Disabilities*.

E Mr Speaker an 2021 Minis ti fek antre, ou ti fek *join Cabinet* Minis e mon rapel anba gidans *Chairmanship* Mrs Onorab Esparon nou i envit ou dan en miting kot

mon ti pas lo sa dokiman ki dan mon lanmen e sa dokiman li menm i entitle, *protocol to the African charter on human and peoples right on the rights of persons with disabilities in Africa.*

E li menm li sa *chart* i parey koman en nespes Lalwa menm li osi. Letan nou ti pas lo la ek Minis ki sa letan Minis ou ti pe dir nou ou pa ti okouran poudir i ti annan sa.

Mon pe demande mon kestyon Mr Speaker, pandan sa bann letan ki nou'n pase depi komans- nou ti komans koz lo sa *chart* avek Minis e ki i annan en kantite legzanp ladan ki petet nou pe demann bann pei Lafrik pou adopte sa Mr Speaker.

E nou Sesel i paret akoz bokou sa bann keksoz i dan nou Konstitisyon wi e nou Sesel mon pe petet mazinen si nou pe al dan laliny pou fer en Lalwa pou bann dimoun avek dezabilite, enn premyerman enn mon ti a kontan petet nou lo kote Sesel nou adopte sa *chart*.

E an menm tan si Minis petet ou pou agree petet pou nou fer serten demars pou nou anmenn li devan Gouvernman e ki nou Sesel nou adopte sa dokiman e ki Minis osi i ganny en kopi kekfwa si i annan Lalwa pou li fer i tant pou servi en pe keksoz ki dan sa *chart* akoz i sitan detaye. Mersi.

MR SPEAKER

Mersi. Minis ou adrese.

MINISTER MARIE-CELINE ZIALOR

Mersi Mr Speaker. Mon pou pas parol apre avek *DG* pou donn en pti pe plis lo travay ki ganny fer.

Tou sa bann travay ki nou bezwen fer, sirtou nou bann Lalwa ouswa Polisi ouswa bann keksoz ki pou en long peryod letan, nou anvi fer li byen nou anvi pran nou letan osi e pandan sa bann letan ki nou'n la, la en kantite travay in ganny fer pou nou.

Pou annan en kolaborasyon i bezwen annan en partenarya for e nou'n bezwen avek *COVID* tou dimoun in eparpiye, pou reganny sa bann dimoun vini pou fer sa bann demars parey taler *DG* in dir. Nou pa travay nou tousel e ler ou travay avek dimoun i annan keksoz ki pran en pti pe plis letan.

Wi nou'n koz lo sa *charter* e avan ler nou adopte nenport ki *charter* sirtou internasyonal i bezwen annan bann konsiderasyon e bann dimoun osi i ganny konsilte pou kapab ansanm avek bann expert parey *DG* in dir, fer sa *symposium* pou bann dimoun kapab donn zot lopinyon lo la.

Me selman Mr Speaker si *DG* i annan okenn keksoz pou

azoute spesifik i ava kapab.
Mersi.

MR SPEAKER

Tre byen. *DG* ou annan laparol.

DG ROSA MORIN

Mersi pou ou kestyon. Wi, i zisteman i sa *charter* osi i enn bann dokiman ki nou anvi *also* avek konvansyon pou drwa avek dimoun dezabilite. Parey ki nou koman Sesel in ratifye depi 2029, selman ki pa ankor vin parmi nou bann Lezislasyon Domestik. Li osi, tousala nou pou ganny diskite ansanm dan sa *symposium* ki nou pe al fer premye semenn Zilyet. Mersi.

MR SPEAKER

Mersi *DG*. Onorab Zialor, ou kestyon.

HON NADDY ZIALOR

Mersi Mr Speaker. Bonzour Minis e tou dimoun dan delegasyon. *DG*, Minis i annan 2 keksoz kle ki zot in mansyonnen dan zot larepons. Sa se *National Policy* e la resaman se konvansyon pou bann drwa avek dimoun ki pe viv avek dezabilite.

Parey nou konnen Polisi in la pou en pe letan, sote 10an i pa ankor revwar e napa enn nouvo. Eski dan tou sa bann prosesis ki pe ganny dir zot annan en *timeframe* petet

avan lannen fini oubyen avan manda fini, ki nou pou annan en *National Policy* an plas pou sa group dimoun pour ki sa i kapab bouz nou ver sa *Disability Act* ki Sesel in antisipe e i bezwen.

Apre, an term konvansyon. Fodre ki nou fer resorti ki enn bann zouti ki'n ede annan transformasyon Sesel se sa ratifikasyon konvansyon e ki travay ki pe ganny fer avek tou bann lezot *stakeholders* pou fer sir ki sak fwa en Lalwa i ganny swa amande swa a novo, ki sa konvansyon li menm i pe ganny enkorpore pou fer sir ki drwa sa group dimoun vreman pe ganny artikile dan tou nou bann Lalwa nasyonalman? Mersi.

MR SPEAKER

Mersi Onorab. *DG*.

DG ROSA MORIN Mersi pou ou kestyon Onorab. Pou ou premye kestyon wi, nou konnen i annan sa *National Disability Framework* ki ti ganny fer depi 2014 selman i ti zis dan lafason en *draft* e sa osi i en dokiman ki mon'n lyez avek nou divizyon ki fer Polisi pou nou kapab revwar.

Akoz i en dokiman ki nou bezwen rediskite, akoz depi 2014 ziska la i annan en kantite keksoz ki'n sanze lo platform ki annan pou fer avek

dezabilite e ki sa *framework* li menm li i bezwen ankadre sa bann novo sanzman ki nou pe koze la konmela.

E pou, lo kote konvansyon wi. Depi lannen pase nou'n komanse e sirtou sa lannen la nou'n vreman, vreman konmsi pe entansifye ki tou nou bann programm ki nou pe fer, tou nou bann aktivite ki nou pe fer, nou pe vreman fer enkli bann lartik e kwa ki konvansyon i ganny dir pou sa group dimoun.

E ki nou fer sir ki menm si i annan Lalwa ki annegzistans pour le moman me si sa Lalwa ki annegzistans ki pa ankadre sa group dimoun e ki la nou ler nou vini ki nou annan nou bann miting ki nou fer sa resorti e sanmenm sa ki nou, nou la. Nou pe kontinyelman *raise awareness* pou dir i annan bann *existing Laws* ki la pour le moman me ki pa ankadre ki konvansyon i dir.

E sa ki la i en travay ki nou bezwen pe- i en travay ki pou kontinyel aktyelman. Mersi.

MR SPEAKER

Mersi DG. Onorab Cosgrow. Onorab Cosgrow ou kestyon.

HON WALLACE COSGROW

Mersi Mr Speaker. Bonzour Minis avek ou delegasyon. Minis kestyon ki devan nou i

enn ki pe adres size Lalwa an se ki konsern okenn Lezislasyon (pardon), an sa ki konsern bann dimoun i pe viv avek dezabilite.

Mon kestyon i se ki, eski i annan Polisi an plas pou dil avek par egzanp bann donasyon ki petet Minister, si Minister i resevwar bann donasyon pou asiste bann diferan dimoun ki viv avek dezabilite.

So, eski zot annan en Polisi ki mannyer zot dil avek, zot resevwar, zot gard sa bann donasyon apre distribye avek bann dimoun ki annan dezabilite.

Dizon par egzanp en donater i donn R200mil atraver en tyek. Ki zot fer avek, ki mannyer zot gard li e ki mannyer zot distribye sa avek bann dimoun ki annan dezabilite? Mersi bokou.

MR SPEAKER

Mersi Onorab. Minis. DG a reponn?

DG ROSA MORIN

Mersi pou ou kestyon. Pour le moman depi ler divizyon in ganny etablir 2021, nou pa'n zanmen ganny okenn donasyon moniter. Selman nou ganny bokou bann donasyon par egzanp bann *assistive*. Nou apel sa ban *assistive lekipman*, par egzanp *wheelchair* e ki sa i sa

bann dimoun ki nou'n *already* idantifye e ki sa lorganizasyon zot, zot anvi donn sa bann dimoun.

Me selman nou annan en *Disability Trust Fund* an plas ki sa ki ton anba nou e wi nou annan en *Administering Policy* ki, ki mannyer pou nou zer sa fon e ki tou bann peyman ki bezwen pas atraver bann prosedir ki bann peyman i bezwen pas atraver finans. Mersi.

MR SPEAKER

Mersi *DG. Onorab Esparon* ou kestyon.

HON REGINA ESPARON

Mersi Mr Speaker. Bonzour tou dimoun, Minis ek ou delegasyon. En bonzour spesyal pou bann zabitan Point Larue ki anler dan Galeri, byenveni.

Mr Speaker, mon ti a kontan osi zwenn avek Onorab Lemiel, Minis pou petet demande ki Sesel osi i ratifye sa konvansyon, sa protokol kont dezabilite, parske sa protokol ti ganny adopte depi 2018 parey nou'n dir e ziska prezan nou bezwen 15 sinyatir pou li antre an viger e ziska prezan nou annan zis 10 sinyatir. Petet nou devret zwenn avek bann lezot pei Lafrik pou nou osi sinyen pou li kapab ante an viger.

Mon kestyon Mr Speaker, eski dan zot travay zot annan sa sinerzi avek Lopital North East Point. Parske Lopital North East Point, vi ki i dan en lenstitisyon apar li me i tonm anba Minister Lasante. Laba osi nou annan dimoun ki pe viv avek dezabilite.

Eski i annan sa sinerzi avek Lopital North East Point kot i konsern bann dimoun ki pe viv avek dezabilite pou enkli zot osi dan bann programm ki ganny fer lo nivo nasyonal? Mersi.

MR SPEAKER

Mersi Onorab. *DG.*

DG ROSA MORIN

Mersi pou ou kestyon. Non pou le moman lo kote dezabilite non, selman divizyon nou lyez bokou avek Lopital North East Point pou nou bann dimoun aze, akoz sa nou ganny bokou bann demann sirtou parey nou bann dimoun aze ki dan *home* e ki la ki nou lyez bokou avek sa lenstitisyon pou kapab ankadre nou bann dimoun aze, selman ki pa kapab ganny admit dan nou bann *home* ki egzistan la pou le moman. E ki la nou travay avek zot ler i annan en plas ki vin *available*, la ki nou kapab plas nou bann dimoun aze. Selman lo kote

dezabilite pour le moman non.
Mersi.

MR SPEAKER

Mersi. Kestyon Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Mon kestyon i en pti pe dan laliny Onorab Cosgrow, akoz ler nou pe koz lo bann donasyon par egzanp *wheelchair or zimmer frame* pou ed bann dimoun marse.

Mon'n vwar petet dan mon distrik kot i annan dimoun ou a krwar zot pa pe ganny ase lenformasyon pou konnen kote pou ale pou zot ganny sa bann lasistans. I annan i vin ver mwan e prezan mon bezwen al rod en pti *sponsor* eksatera pou gete ki mannyer pou kapab ed zot.

Eski zot in met okouran sa bann dimoun ki pe viv ek dezabilite dan tou distrik parey lo mon zil La Digue, pou konnen ki bor zot pou ale ler zot bezwen en keksoz parey en *mobility aid* pou ed zot deplase? Mersi.

MR SPEAKER

Mersi. Wi, nou pe al en pti pe an deor kestyon vi ki kestyon ti lo Lalwa me vi ki Minis i la petet sa lenformasyon i ava itil.

DG ROSA MORIN

Mersi Onorab pou ou kestyon. Wi aktyelman wi, nou travay bokou, nou fer bokou bann komunikasyon avek dan distrik e menm ler nou'n al nou bann vizit. Akoz nou fer bokou bann vizit dan distrik e sanmenm sa ki nou bann group dimoun, sirtou avek dezabilite zot okouran byen poudir nou annan sa fon e ki zot vin. Aktyelman nou ganny bokou bann laplikasyon akoz zisteman ki nou bann dimoun i okouran poudir sa fon i la e ki zot kapab vin kot nou pou zot ganny asiste. Mersi.

MR SPEAKER

Mersi. Minis oule azoute?

MINISTER MARIE-CELINE ZIALOR

Wi. Mersi Mr Speaker. Petet mon ti ava profite atraver ou Mr Speaker kekfwa dir Onorab Uranie ler i ganny sa bann *request* nou ti ava byen kontan nou osi gannyen pa ezite pou ou kontakte divizyon e nou ava dir zot ki prosedir zot bezwen fer pou zot ganny asiste ek bann lekipman. Mersi.

MR SPEAKER

Mersi. Onorab Pillay ou kestyon.

HON SEBASTIEN PILLAY

Mersi Mr Speaker. Bonzour *panel*. Lo sa bann kestyon ki'n ganny demande la i annan sa size ki'n *crossover* an sa ki konsern bann *home for the elderly* e dezabilite *within the home for the elderly* ki vin en portfey.

Par egzanp pran bann *homes for the elderly*, ozordi La Retraite bann landrwa. *Within* zot revizyon Lalwa ki zot pe propoze. Ki mannyer zot pou armoniz dan tou *aspects* oubyen zot pou separ li konpletman?

Akoz *as it stands* la, ou annan en *issue* ki pe souleve par egzanp kondisyon dan serten *homes* ki bann dimoun pe met devan e sa kondisyon i *transcend both* en dimoun ki aze e en dimoun ki annan en dezabilite. So, eski zot pe konsider sa?

E dezyenmman, dan sa revizyon Lalwa Minis ou ti donn nou en *commitment* pou konsider sa size bann manman ki *carer* ek zot zanfan ki annan dezabilite. E nou tou nou konnen poudir *carer* i ganny *managed* par novo Lazans e prezan i annan sa size konze pou sa bann manman ki bezwen okip zot bann zanfan. Akoz i annan serten paran ki pa kapab pran konze.

So, eski ou'n komans sa diskisyon e dan sa re ankadreman Lalwa ou pe

regard osi sa *care* lo nivo domisil ki sa dimoun avek dezabilite pe gannyen? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mr Speaker, wi bann dimoun *elderly* osi ganny ankadre ler zot annan en dezabilite ki anba nenport ki Lalwa ki pou annan, ki Onorab Zialor in mansyonn sa *Act* posibilité. Selman nou pa bann teknisyen Lalwa, nou bezwen anmenn devan *AG* avek bann *stakeholders* ki *DG* in mansyonnen pou fer sesyon pou kapab ganny bann pli bon *advice* ki mannyer sa ban ankadreman i ganny fer Mr Speaker.

E parey mon'n dir ler in pare pou al devan Konsey Minis i ava ganny aprouve apre i a vin kot Lasanble pou nou vvar sa lankadreman byen. Me selman nenport ki dimoun irespektiv son laz ouswa nenport. Si i annan en dezabilite i ganny konsidere nou pou regarde ki Lalwa i kouver sa.

Son dezyenm kestyon Mr Speaker. *Carer* pou model, sa i en lot topik, i en lot Lazans ki *Home Care* pe travay lo model e model *carer* i enkli bann

dimoun dezabilite. Definitivman e i pe travay pre avek Departman Lafanmir e letan sa model i ava pare li osi i bezwen al devan Konsey Minis pou sa bann, fer sir sa bann servis ki nou bann dimoun i bezwen la i ava gannyen.

I annan bann *crossover*, definitivman i pou annan bann keksoz ki *crossover* kanmarad lo la e nou ava regarde nou ava fer sir ki bann Lalwa, ouswa bann Polisi, ouswa bann fason fer i permet ki i deservi tou sa bann group dimoun. I annan dimoun ki a tonm dan en kategori dezabilite ouswa i ava tonm dan kategori *elderly*. I annan i tonm dan tou lede e ler i tonm dan tou lede nou a bezwen fer mannyer ki wi, zot ganny kouver. Mersi Mr Speaker.

MR SPEAKER

Mersi Minis. Bon nou'n pran tou kestyon, tou Manm ki'n lev lanmen. Nou pa antre lo en novo kestyon la, nou a pran poz e nou a repran 11er. Mersi. Mersi Minis e ou delegasyon e M2anm.

(break)

MR DEPUTY SPEAKER

Welcome back tou dimoun e nou pou kontinyen avek nou sesyon *questions for oral answers* bomaten e avek nou,

nou annan bann Zofisyen sorti kot Minister Lazenes, *Sport* avek Lafanmir pe dirize par Minis Marie-Celine Zialor.

Nou'n ariv lo kestyon 144 ki dan non Onorab Michel Roucou. 144, 143 e sa kestyon i dan non Onorab Richard Labrosse. *Please proceed.*

HON RICHARD LABROSSE

Mersi Mr Speaker. Definitivman i dan non Onorab Labrosse ki pe reprezent en distrik ki apartir bann dimoun entelizan dan Sesel sa se byensir Plaisance.

Mr Speaker 143 i al *comme swivan*.

Eski Minis pou Sport i kapab enform Lasanble konbyen larzan ki in ganny distribye an total avek bann atlet ki'n ganny meday dan dernyen Zwe de Zil ki ti fer Madagascar? Mersi Mr Speaker.

MR DEPUTY SPEAKER

Mersi Onorab. Mon ava envit *panel* pou larepons, *Minister*.

MINISTER MARIE-CELINE ZIALOR

Mersi Mr Speaker. Mr Speaker, avan Zwe de Zil Madagascar 2023 nou ti fer lanons pou rekompans nou bann atlet ki ganny meday e apre ki tou bann travay administrative e kontrol in ganny fer nou'n fer bann

peyman parey ti ganny anonse.

E menm Mr Speaker, nou'n rekompans en atlet dan laboks ki nou ti santi i merit son meday lor menm si ofisyelman i ti ganny en meday larzan e larzan ki'n ganny peye i *comme swivan*.

Pou bann atlet i arriv en total R2milyon 685mil 473, nou'n osi pey bann *coach* avek *managers*, i arriv en total R396mil e total tou larzan ki'n ganny peye i en pti pe plis ki 3milyon, 3.081473 milyon. Mersi Mr Speaker.

MR DEPUTY SPEAKER

Mersi *Minister*. Mon ava envit Onorab Labrosse pou son siplamanter.

HON RICHARD LABROSSE

Mersi Mr Speaker. Minis mersi bokou pou sa lenformasyon e mersi osi pou kit ou lobligasyon parey ou ti'n promet dan Lasanble pou rekommans nou bann atlet ki'n fer byen dan Zwe de Zil.

Mr Speaker mon 2 kestyon siplamanter i *comme swivan*.

Premye Minis, ler nou pe koz dan *reward* bann atlet avek mwayen moniter parey nou dir. eski Minis ou kapab eksplik Lasanble osi ler nou pe fer bann *reward* parey, ou'n dir la plis ki 2milyon ki'n

ganny donnen avek bann atlet.

Eski dan sa bann larzan osi ki zot donn sa bann atlet eski i annan bann parey nou dir sa bann *educational*. Ki nou kapab eksplik zot kekfwa pou zot osi kapab met en pti larzan de kote ler zot annan zot bann aktivite sportif aletranze, ki souvandfwa nou vvar zot dan bann difikilte ki zot bezwen tap laport en pti pe partou ?

E mon dezyenm kestyon Mr Speaker, ler nou pe koz lo distribisyon sa bann larzan an tou 3milyon an total, si mon'n byen konpran byen ki Minis in dir. Eski dan sa bann larzan osi Mr Speaker, i enkorpor osi bann lezot dimoun ki direkteman par egzanp mon konnen ti annan sa zafer larzan pou bann *child minders* pou vey bann zanfan bann atlet. Si tousala in enkorpor ladan? Mersi Mr Speaker.

MR DEPUTY SPEAKER

Mersi Onorab. *Minister*.

MINISTER MARIE-CELINE ZIALOR

Mr Deputy avek ou permision mon ti a kontan ki *CEO Arissol* i reponn sa 2 kestyon. Mersi.

MR DEPUTY SPEAKER

Sertennman, *please proceed CEO*.

CEO MARC ARISSOL

Bonzour Deputy Speaker. Bonzour bann Onorab e bonzour tou dimoun a lekout.

Onorab sa kestyon ki ou'n demann nou anver en ledikasyon ki mon prezimen ou fer avek bann diferan atlet ki pe ganny zot *reward*. Nou pa fer sa, me selman *lately* nou kit sa avek federasyon. Me petet i en keksoz ki nou kapab konsidere dan le fitir, mon krwar i en pwen ase enportan.

Lo kote *loss of earning* avek *child minding*, sa i annan en lot larzan ki nou'n fer peyman, sa i pa enkli dan sa bann *reward* la ki nou'n mansyonnen. Mersi.

MR DEPUTY SPEAKER

Mersi CEO. Mon pou pas laparol aprezan avek Onorab Labonte.

HON ANDY LABONTE

Mersi Mr Speaker. Ankor enn fwa bonzour Minis avek ou *panel*.

Minis mon vreman apresye ki zot pa'n rekonpans selman atlet me osi bann *coaches*. So, nou konnen poudir bi ankouraz atlet, la sa pti larzan i plizoumwen en fason pou sey ankouraz bann atlet pou partisip dan bann levensnman sportif e pou kapab anmenn en meday Olenpik parey ou vizyon.

So, la mon anvi pran sa lokazyon pou mon felisit Adrian Monthy avek Ms Estelle Barreau ki zot ti pe partisip dan 64enm Sesion Enternasyonal koman Anbasader Zenn Olenpik, Lagres.

E eski dan sa lespri zot pe mazin osi pou petet ed sa bann lezot dimoun ki pe ede pou fer pei *shine*. Konmsi annou get li dan son totalite an relasyon avek sa kestyon ki ler nou pe rekompans sa bann atlet avek bann keksoz parey. Mersi.

MR DEPUTY SPEAKER

Mersi Onorab. CEO ki pou reponn.

CEO MARC ARISSOL

Onorab mersi pou ou kestyon. Zis pou fer resorti petet mon pa konnen si nou pa'n ganny okenn lenformasyon oparavan, me selman mwan letan mon'n vini i premye fwa ki nou *reward* osi bann *coach* avek asistan *coach*.

E nou'n osi, ler mon'n zwenn avek zot nou'n asize nou'n vwar poudir i annan en *team manager* ki la li osi ki li i *manage team* nou'n osi fer provizyon pou zot. Nou ti annan en, konmsi pou nou sa nou'n santi poudir zot osi zot bezwen ganny sa pti *reward* akoz parfwa nou get zis en atlet, me zot osi zot bezwen

ganny ankadre e bann ankadrer osi nou bezwen get ladan.

So, sa i en keksoz ki nou'n konsidere dan sa Zwe de Zil lannen pase. Mersi.

MR DEPUTY SPEAKER

Mersi CEO. Mon pou donn laparol Onorab Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Minis mwan mon kestyon i vize lo bann atlet. Nou konnen ki i annan atlet ki'n ganny meday ki'n teste pozitiv pou dopaz, si i vre?

Eski larzan ler ti ganny peye in ganny peye avan tes ti arive ouswa apre tes. Eski sa bann atlet ki'n teste pozitiv zot in ganny arase sa larzan ouswa zot in retenir zot larzan menm si zot in teste pozitiv pou dopaz? Mersi.

MR DEPUTY SPEAKER

Mersi Onorab. CEO ki pou reponn.

CEO MARC ARISSOL

Ok, Onorab nou'n fer sir, se sanmenm sa ki ti annan en pti pe sa retar e ti annan en pti pe sa bann pti brouyman akoz nou ti pe tarde. Se sa retar se pou nou espere avan pou nou get *status* nou bann atlet avan ki nou fer sa.

Akoz letan ou'n donn en atlet son *reward* i pa zis fasil, ou'n donn li R25mil pou ou ale al dir li rann, i annan en bann prosesis legal ki finalman ou pe zis gat resours Gouvernman. Se sanmenm sa nou ti met en *hold* lo sa *reward ok*. Mersi Onorab.

MR DEPUTY SPEAKER

Mersi CEO. Mon pas laparol avek Onorab Rachel Spiro.

HON RACHEL SPIRO

Bonzour Onorab, Speaker. Bonzour Minis avek ou delegasyon. Bonzour tou koleg Onorab e bonzour tou dimoun ki a lekout.

CEO ou'n fer sorti retar dan peyman. Zisteman mon kestyon i lo sa laliny. Lefet ki Gouvernman ti'n prononse ki i pou donn sa bann atlet zot rekompans, me selman ti napa en dele letan. Eski la provizyon pou ganny fer a lavenir pou letan nou'n donn en *commitment* nou kapab dir dan tan dele letan nou pou rekompans sa bann atlet? Sa i mon premye kestyon.

Epi an sa ki konsern sif taler ou'n mansyonn, ou pa'n mansyonnen lo sif ki zot in peye pou *child minding, day care* eksateria, e ki en pti pe adisyonnal me selman an pasan ou'n mansyonnen, si ou annan sif si ou kapab CEO donn nou silvouple. Mersi.

CEO MARC ARISSOL

Onorab mersi pou ou kestyon. Pou nou, parey mon pe dir ou *it's a learning curve* ki nou pe pas atraver. So, sa ki nou'n vwar in arive e nou pou fer sir preznan pou nou kapab, akoz i pa ti zis fasil akoz ou bezwen esper *WADA* pou zot kapab donn nou *go ahead*. Nou bezwen esper zot e sa prosesis i en pti pe long e i pa zis fasil pou nou osi donn ou en dele letan akoz nou kapab met en lasirans, apre nou vwar nou pe reponn kestyon.

Me selman la nou'n vwar en pti pe, nou'n fer en leksperyans dan sa Zwe de Zil e mon pe espere ki nou a kapab travay lo la pou donn nou pete en dat ki ava apropiye *ok*.

Malere mon pa'n anmenn lenformasyon pou *loss of earning* avek *child minding*. Me selman dan en lot sesyon mon krwar mon'n deza mansyonn sa e mon kapab fer ou gannyen apre Onorab.

MR DEPUTY SPEAKER

Mersi CEO. Mon krwar Minis i oule azout en keksoz lo la.

MINISTER MARIE-CELINE ZIALOR

Mersi Mr Speaker. Mr Speaker, mon profit lokazyon akoz sa komanter dele letan i kontinyen leve, angiz ki nou

pa pe *commit*. Mon anvi garanti ki nou dan sa Gouvernman nou anvi fer keksoz byen.

E sanmenm sa dan mon larepons mon'n dir apre ki bann louvraz administrative, bann kontrol in fini ganny fer pou fer sir. Akoz dan lepase Mr Speaker, sa ki CEO pa'n dir ki in vin zwenn, ki oditer in vin vwar nou bezwen korize se bann peyman ki'n ganny fer nenport koman. Zis ganny peye koumsanmenm. Nou pa kapab fer sa avek larzan *tax* bann dimoun.

E nou bezwen donn rekompans, me selman nou bezwen fer li osi dan en fason byen administratif ki demen nou kapab rann kont. Nou kapab eksplike lekel ki'n ganny peye, akoz in ganny peye, pour kwa in ganny peye e osi met, napa okenn osi tou Polisi kler, kriter kler. Met tousala ater kler pou nou kapab fer sir.

E premye fwa nou'n sorti en Zwe de Zil Mr Speaker, nou annan en rapor. Nou annan en rapor ki NSC in fer pou kapab bann rekondasyon pou aranze. Mersi.

MR DEPUTY SPEAKER

Mersi Minister. Mon pou donn laparol Onorab Romain.

HON GEORGES ROMAIN

Mersi Mr Speaker. Minis mwan mon kestyon ti'n tous en pti pe dan laliny Onorab Loizeau. Bann atlet ki'n ganny teste, parey zot dir dopaz ki ti rezulta pozitiv, si zot annan sa sif, zot kapab dir nou konbyen atlet ki ti ganny teste pozitiv?

Apre mon dezyenm kestyon, an vi ki nou konnen sa size rekonpans pou bann meday ti en size ki ti koz bokou dan Lasanble e ti annan en leokri lo la.

Alors mon pe demann Minis si zot annan en plan ki la an ekrir lo papye ki ler bann atlet i al fer sa sport enternasyonal ki zot pou dir zot pou ganny rekonpans larzan ki kantite dele letan sa i pou dire?

Ki demen zot pou konnen ki in dir nou *within* en mwan ki nou pou kapab ganny nou rekonpans, ki nou pa bezwen tann plizyer kestyon ankor i a vini. ki *at least* ou annan en striktir an plas.

Mon ti a kontan si Minis i kapab dir nou si nou annan en keksoz koumsa an plas. Mersi Mr Speaker.

MR DEPUTY SPEAKER

Mersi Onorab. Minister.

MINISTER MARIE-CELINE ZIALOR

Mersi Mr Speaker. Mon pou reponn a dezyenm kestyon

apre mon a les sa enn premye avek CEO.

Dele letan mon konnen nou tou nou anvi konnen 1 mwan, 2 mwan. Me i pa depan lo zis nou NSC, WADA i depan pa toulstan ki lakantite atlet ki pe teste i parey. Parfwa i depan lo rezulta ki mannyer, pli ou ganny plis meday lor, pli i fer plis tes.

Ler i fer plis tes i pran plis letan. Sak zwe i diferan, sak zwe i annan diferan disiplin. Nou pa pou kapab donn dele letan, me selman nou ava kapab komunik ek bann atlet fer zot konpran letan WADA e nou kapab demann WADA konbyen letan i pou pran sa dele letan ki zot dir avek nou la preznan nou ava kapab fer sa.

E sa i en *reward*, sport Sesel i pa ankor ariv profesyonnel, i pa en peyman. I en rekonpans ki nou fer pou ankouraz nou bann dimoun sa e mon krwar poudir letan NSC pe fer son bann ledikasyon, parey in ganny sizere dan Lasanble pou nou kontinyelman avek bann federasyon avek bann atlet pou nou kapab fer zot konpran ganny li byen kler sa.

Rezon akoz in ganny anmennen la akoz politik sa, ti napa naryen pou fer avek dele letan. Mersi Mr Speaker.

MR DEPUTY SPEAKER

Mersi Minister. Mon pou pas laparol aprezan avek Onorab Zialor.

HON NADDY ZIALOR

Mersi...

MR DEPUTY SPEAKER

Arr, *hold on* Onorab Zialor. Wi, i annan en dezyenm kestyon lo la kantite dimoun ki'n teste pou dopaz ki CEO ti pou reponn.

CEO MARC ARISSOL

Mersi Deputy Speaker. Onorab mon napa egzakteman sa, akoz ki nou'n fer nou, i annan bann tes ki'n vin avan. Akoz i annan dimoun si in ganny teste avan oubyen apre, i annan serten diferans ou konpran.

So, mon ava donn ou sa bann lenformasyon kler e mon ava anvoy kot Lasanble pli tar, mon ava klasifye li pou ou. Mersi.

MR DEPUTY SPEAKER

Mersi CEO. Aprezan Onorab Zialor ou kapab *proceed*.

HON NADDY ZIALOR

Mersi Mr Speaker. Bonzour ankor enn fwa bann dimoun ki lo *panel*.

Minis lo ou larepons ki ou'n donne, si mon pa tronpe *in terms of* peyman ti osi annan en kestyon konsernan bann atlet *Special Olympic* e ti

annan en komitman ki ti ganny donne ki si letan peyman pou Zwe de Zil i fini e zot vwar i annan sa *gap* ki zot kapab *reward* bann atlet *Special Olympic*.

Eski sa in ganny materyalize e eski zot satisfe ki tou bann dimoun e parti prenon i satisfe avek *reward* ki'n ganny donne? Mersi.

MR DEPUTY SPEAKER

Mersi Onorab. CEO ki pou reponn.

CEO MARC ARISSOL

Mersi Onorab pou ou kestyon. Onorab i vre nou pa ti'n bidzete pou sa. Nou ti dir zot, parey ou'n dir egzakteman letan nou fini avek Zwe de Zil. Sa in fini ganny fer, bann dimoun in byen satisfe. Mon kontan ki Mrs Ernesta ti ekrir nou pou remersi nou, savedir tou dimoun in satisfe avek zot *reward*. Mersi.

MR DEPUTY SPEAKER

Mersi CEO. Mon ava pas laparol avek Onorab Mondon.

HON TERENCE MONDON

Mersi Mr Speaker. Mr Speaker, CEO in mansyonn ki zot ti dan en *process* en *learning curve* e mon anvi konnen ki bann leson ki zot in retire e kwa ki zot pe met an plas vreman pou kapab asire ki zot kapab donn sa servis

parey a laoter ki nou pe anvizaze? Mersi Mr Speaker.

MR DEPUTY SPEAKER

Mersi Onorab. *CEO proceed.*

CEO MARC ARISSOL

Mersi bokou Onorab. I annan en kantite keksoz petet *list* i pou long, me selman parmi se ban *Policies* ki nou'n vwar ki petet nou ti napa, in annan sa ki nou dir en labitid fer keksoz koumsa.

E letan bann dokiman in vini, kantite dimoun. Par egzanp mon a donn ou en legzanp. Letan nou pe koz lo *child minding* oubyen *loss of earning*, i annan en dimoun normalman ki li i ganny, i anploye *self-employed* e i ganny R500 par zour. E pou ou kapab pey en dimoun *ok*, ou bezwen kapab annan bann dokiman.

E ler mon pe koz bann dokiman. ou *Tax Registration Number TRN*, ou annan ou kot sertifika kot *licensing* e bann lezot dokiman ki prouve ki *at the end of the day* avan mon fer sa peyman, *effect the payment*. Mon vwar poudir be vre sa dimoun i finalman *self-employed*.

Be nou'n vwar en kantite sa bann dokiman ki'n vini ki nou pa kapab zistifye. Zis en dimoun i anvoy en let i dir ou *self-employed*. Akoz, letan ou *self-employed* ou ganny plis

larzan ou vwar la. So, i annan en kantite lesion ki nou'n aprann. Oubyen par egzanp petet en dimoun ki ganny *child minding*, papa i dan en disiplin, manman i dan en disiplin ou pe donn *child minding* pou menm zanfan 2 fwa.

So, tou sa bann keksoz ki nou'n bezwen ale sey met en kout lord ladan. En ta aprann nou'n aprann e nou ankor pe aprann. Demen mon kapab vwar en novo keksoz, prezan dir be *ok* mon ti fer en fot, alor mon a bezwen re aranze.

So, it's a real learning process ki nou pe pas atraver. Me mon konnen, petet ankor dan, ankor detrwa, i mean ankor mwan nou ava kapab met mazorite keksoz en pti pe anba kontrol. Mersi bokou Onorab.

MR DEPUTY SPEAKER

Mersi CEO. Nou'n arriv a lafen sa lalis 6 Manm ki ti'n demann pou demann kestyon siplemanter lo sa kestyon.

Donk nou a bouz lo kestyon 144 ki lo non Onorab Michel Roucou.

HON MICHEL ROUCOU

Mersi Mr Speaker. Bonzour Minis ek ou lekip. Bonzour tou dimoun ki a lekout.

Mr Speaker, mon kestyon i al koumsa.

Eski Minis i kapab dir avek nou Lasanble kan ki NSC pou komans demars pou *tender* Kontra netwayaz bann facilite sport dan bann distrik parey i ti ganny anonse dan Bidze? Mersi.

MR DEPUTY SPEAKER

Mersi Onorab. Mon ava envit *Minister* pou larepons.

MINISTER MARIE-CELINE ZIALOR

Mersi Mr Speaker. Mr Speaker NSC in komanse sa demars pou donn Kontra netwayaz bann facilite sport dan bann distrik e sa demars in komans avek en legzersis ase konpreansiv ki enkli sa bann aktivite swivan.

Revwarr *scope of work* pou sa bann facilite, idantifikasiyon bann facilite ki pou lo *tender* akoz i annan ki pa pou lo *tender*. Evalyasyon pou etablir valer sa bann louvraz, diskisyon avek *procurement* pou vwar prosedir donn Kontra.

An se moman NSC in ariv staz pou fer diskisyon avek Departman Finans pou ganny sipor lo ki pli bon fason pou zер sa Bidze ki'n ganny donnen pou sa aktivite e osi nou bezwen pe fer serten negosyasyon. Posibilite redistribisyon serten bann alokasyon. Mersi Mr Speaker.

MR DEPUTY SPEAKER

Mersi *Minister* pou ou larepons. Mon envit Onorab Roucou pou ou siplemanter.

HON MICHEL ROUCOU

Mersi Mr Speaker. Annefe mon oule remersi *CEO* pou bann travay ki zot in deza pe komans fer.

Minis si ou kapab dir nou, lo bann plizyer facilite ki annan dan bann distrik. Ki bann pli gro konsern an term ler bann dimoun i vin servi an term lo kote *litters* ki zot zete e ki bann fason zot pe mazin pou zot kapab travay ansanm avek distrik kot i annan sa komunikasyon pou fer sir ki bann travay i ganny fer dan en dele letan? Mersi.

MR DEPUTY SPEAKER

Mersi Onorab. Sa kestyon pou reponn par *CEO*.

CEO MARC ARISSOL

Mersi Onorab pou ou kestyon. Mersi Deputy Speaker. Pli gro problem ki nou gannyen ki nou pe resevwar la, *well* nou problem entern se en pti pe kontrent bidzeter. Sa mon dir ou, mon krwar sa i atraver Minister. Se sa kontrent bidzeter pou nou fer serten keksoz.

Me par kont nou annan osi *littering* avek vandalizm. Vandalizm i nou gro problem ki nou fer fas lo kote distrik.

So, petet mon profit sa lokazyon pou enplor tou lede kote latab bann MNAs pou petet koz ek zot bann *constituent's*. Mon krwar i mank en pe ledikasyon.

Me selman par kont mon bezwen admet poudir i annan serten distrik ki mon'n vwar ki zot zer zot fasilite tre byen e mon ti a kontan felisit sa bann distrik. Mon pa oule al nonm distrik konmsi pou fer sa, me selman mon ti a voudre kontan pou felisit zot akoz i donn nou sa lanvi.

Me i annan landrwa kot ou al detrwa fwa, i annan en distrik an partikilye Sanmdi mon bezwen al get en kou akoz ou vwar dimoun pe dormi dan *changing room*, pe reste lanmenm e mon'n bezwen enform lapolis. Akoz mon'n dir ek lapolis ti ava bon zot bezwen fer en bon pe patrol, gete. Akoz se sa bann dimoun ki vin dormi la ki vandalize. So, sa i bann *issues* ki nou fer fas avek.

E petet pou adres ou lot kestyon Onorab, lo kote adres bann netwayaz e ki fason ki nou pe fer pou fer sa. Mon krwar mon ti zwenn ek tou bann DAs avek bann, dan zot miting. Nou ti koze ki mannyer nou kapab sey annan en pti Kontra avek enn bann dimoun lo novo distrik pou li *manage* zot bann lenfrastriktir.

Me sa in, nou'n bezwen al kot *procurement*. In dir nou, *the problem* se ki i depans nou *threshold*. So, therefore zot in fer nou fer en legzersis. Savedir pran bann *one off* regarde. I enteresan pou nou kapab vwar poudir i annan serten distrik ki li nou'n ganny en kotasyon ki vreman ba e ki ou vwar en gran *disparity* dan bann lezot distrik sorti 5mil pou ariv 15mil, 17mil.

Prezan ki nou pe dir la, an vi ki zot pe dir nou *go back*, nou'n fini fer sa parti legzersis e ou pou vwar poudir ou ganny ou R4milyon zis pou nou *manage* nou bann lenfrastriktir.

E sa i pa zis, Mr Speaker, i pa zis pou laplenn sa. I pou tou bann lenfrastriktir. bann *changing room* pou aranze si i annan problem pou fer avek *plumbing* elektrisite. E pou zis fer resorti poudir letan sa transfer bann laplenn in sorti kot *Local Government* in vin kot nou, nou'n ganny nou 1.5milyon ki nou santi petet sa osi i pa pe ase. Se sa nou pli gro problem.

So, ler ou pe gete zis pou koup zerb dan sa 4milyon an tou, sa 1.5 avek sa ki nou, nou ti annan pou *maintenance* i ariv nou 3.3milyon ki reste ou apepre 600ekek milyon. *I mean mil sorry.* R600mil pou nou fer bann lezot *plumbing* e menm aranz *changing room*.

Parey la i annan bann landrwa kot nou pe re aranz *changing room*, re met *toilet* eksetera. So, sa larzan li menm i pa ase.

Me ki nou pe fer nou, parey mon'n dir zot taler. I en *learning process*, nou'n sey al dan sa fason, i pa'n marse. Nou pe regarde, mon'n al kot *procurement* nou, nou tim. Nou'n dir be *ok*, nou'n vwar dan sa legzersis ki nou'n fer i annan en bann dimoun ki pe *bid* sitan *low* apre i annan ki *high*.

Eski nou kapab pran en dimoun, par egzant si mon dir dan en distrik Anse Royale, sa dimoun in *bid low*. Eski nou kapab donn li *regional* prezant. Donn li en group, en lot ki'n *bid low*. Konmsi ki i a redwir sa larzan, *ok*. *On top of that* mon osi annan en diskisyen avek en *local supplier, in fact* nou pe fer en kor leres akoz nou bezwen fer sir ki nou annan en balans pou nou rod en *ride on mower*.

Akoz nou'n vwar poudir en *ride on mower* ou kapab fer 3 laplenn dan en zour. So, *therefore* sa osi *can be*. I a redwir nou *cost* pou nou al fer tou sa bann pti Kontra e kekfwa mon mazinen keksoz i ava al pli mye. Mersi Mr Speaker.

MR DEPUTY SPEAKER

Mersi CEO. Onorab Roucou ou annan klarifikasyon?

HON MICHEL ROUCOU

CEO pou benefis zabitan Mont Fleuri ek bann tim ki servi laplenn Mont Fleuri i annan sa bout kot i annan sa bann *overgrown* la. Si ou kapab dir nou ki bann travay ki *NSC* pou fer lo sa morso laplenn la? Pou benefis bann dimoun ki deservi laplenn. Mersi.

CEO MARC ARISSOL

Onorab mon krwar nou ti anvoy nou bann teknisyen ansanm avek ou nou ti vizite e *feedback* ki zot in donne i pareyman i annan en trou dan sa *drainage* ki prezan li i pe koul lo laplenn.

Se sanmenm sa ki ou vwar sa kote laplenn bor anler ki vir ek lekol segonder li i annan en trale vezetasyon lo la. Se akoz delo i reste la e i fertil. E plis ki sa i annan en larivyer ki pas zis par anba, e ou konnen larivyer i kit sa ki apel *silt*, *silt* i vreman fertil e sanmenm sa ou vwar sa vezetasyon in sa kantite.

Ki nou pe fer nou, nou pe pran en desizyon pou nou bous sa bann trou, *in fact* sa bann trou ti ganny mete pou *drain* later, *sorry* delo from laplenn me vi ki i annan sa larivyer dan bor larivyer pe mont lo laplenn i fer ki delo i *flood in*.

So, ki desizyon nou pe fer. Nou pe met en miray pou,

nou a bous sa bann trou, met en miray pou bar sa delo e nou pe espekte. E zis *bear with* nou, letan en delo in sitan pran en kantite in abzorbe koumsa la, ou bezwen esper en pe letan soley pou nou kapab fer sa obzervasyon si sa in *solve the issue*.

So, i pou pran en pti pe letan. Konpran nou lo sa kote *ok*. Mersi.

MR DEPUTY SPEAKER

Mersi CEO. Mon pou envit Onorab Labonte aprezan pou son kestyon.

HON ANDY LABONTE

Mersi Mr Speaker. Minis ler nou pe koz bann facilite sport dan distrik eski ou Minis pe mazin rod en fason pou favoriz bann pti kontrakter ki baze dan sa distrik, ki kapab partisipe koman dan en fason *selective bidding*.

E la Mr Speaker, permet mwan pou mon kontinyen dir mersi PS Jean Louis, CEO Marc Arissol ek Mr Hansward Kilindo avek zot lekip ki zot kontinyen siport distrik dan tou fason ki nou bezwen zot lasistans. Mersi.

MR DEPUTY SPEAKER

Mersi Onorab. *CEO proceed* avek larepons silvouple.

CEO MARC ARISSOL

Onorab parey mon pe dir ou sa ti nou premye diskisyon. Se pou annan en pti kontrakter o nivo distrik e ki nou ti bezwen fer, nou bezwen fer zot anmenn tou zot bann kotasyon kot nou e, me malere nou *threshold* i 250mil. Sa fot ki nou'n realize, nou ti panse ki i ti par *budget line* me non i par distrik.

So, therefore ler ou gete si nou pou donn ou en Kontra i pou desote sa *threshold* e sanmenm sa ki prezan *POU, procurement* i ankor annan diskisyon pou gete si i pou *allow* nou oubyen non.

Prezan mwan mon pa pe zis esper zot, sanmenm sa ki ou'n dir. Prezan nou ti dir, be nou kapab annan en *plan b* kot nou rod bann kotasyon ki pli pti nou kite apre nou, nou pe rod en *ride on mower* osi pou nou kapab maksimiz sa larzan dan en sans *ok*. Mersi Onorab.

MR DEPUTY SPEAKER

Mersi CEO. Onorab Aglae.

HON EGBERT AGLAE

Mersi Mr Speaker. Mon a dir bonzour Minis, CEO ek ou *Accounting Officer* mon krwar non, ouswa *DG*.

CEO an vi ki ti annan en *mail* ki ti ganny anvoye kot tou bann *DAs* lannen pase, 23 Novanm sa en, 2023. Mwan mon oule en pe leklersisman

akoz still i annan serten konfizyon as lekel sa bann facilite ki pe tonm anba la.

Akoz o komansman ti dir tou, NSC pou zer tou bann facilite sportif dan distrik. Me apre serten facilite ti ganny dir poudir *this is the standard* ki NSC li i pou okipe e bann leres ptiti sa i pou tonm anba *Local Government*.

So, la mwan mon anvi ekliersi lekel petet bann facilite ki zot, zot pou konsider *as part of the ongoing* prosedir pou *award* sa bann *tender* pou sa bann Kontra ouswa eski tou facilite dan tou distrik ki pou tonm anba la? Mon anvi konnen enn fwa pour tou. Mersi.

MR DEPUTY SPEAKER

Mersi Onorab. CEO.

CEO MARC ARISSOL

Onorab letan mon ti pran lofis e sa transfer ti'n ganny fer mon ti anvi plis leklersisman lo la e nou ti annan en miting avek *Local Government* e nou ti *agree* ki, konmsi nou ti negosye sa. Akoz mwan mon ti vwar sa poudir *it will be a mammoth task* dan le sans kot nou napa dimoun, i en nouveau keksoz e Bidze osi ti annan en pe kontrent.

So, zot ti *agree* ki bann pti laplenn, par egzanp si ou annan en pti laplenn anler Mamelles. Anler Mamelles, en

pti laplenn anler dan sa *Housing Estate*, sa i ava responsabilite distrik. Me par kont bann lenfrastriktir, bann kort ek bann *playing field* foutbol ki standar, sa i ava vin responsabilite NSC.

Par kont selman en rezon pou en lot Plaisance, mon konnen petet Onorab ler nou pe balanse Plaisance pa'n tonm kot nou pou en rezon ou en lot akoz nou ti'n pran en lot. Me selman nou kapab fer zot ganny lalis si oule mon ava anvoye kot ou lofis, egzakteman pou nou kapab *demarkate* lekel ki pou NSC, lekel ki pou *Local Government* ok. Mersi Onorab.

MR DEPUTY SPEAKER

Petet si sa lalis i kapab ganny anvoye kot Lasanble ki tou Onorab prezan i ava konn egzakteman zot bann facilite kote i tonbe.

CEO MARC ARISSOL

Ok.

MR DEPUTY SPEAKER

Prosen MNA ki lo mon lalis se Onorab Vidot.

HON AUDREY VIDOT

Mersi Mr Speaker. Bonzour Minis ek ou delegasyon e tou dimoun ankor ki pe a lekout.

Mon kestyon CEO, resaman LWMA in fer bokou lavertisman an term prosedir

pou zot *tender out* bann proze. Ki resours ki zot, zot in servi. Bann sours medya pou asire ki napa en kontrakter ki'n ganny *left behind* dan bann distrik pou zot partisip dan sa proze?

Ou'n dir ou'n rankontre avek bann *Das*, nou konnen poudir i annan, Gouvernman Lokal resaman in annan serten rotasyon kot i konsern bann *DAs* e mon asire ki pa zot tou ki konn bann kontrakter dan distrik.

Ki garanti ou kapab donn mwan en zabitant, bann pti kontrakter Roche Caiman ki petet ki pa'n okouran ki pa'n ganny sans pou zot kapab partisip dan sa bann proze? Mersi.

MR DEPUTY SPEAKER

Mersi Onorab. *CEO* ki annan larepons.

CEO MARC ARISSOL

Ok, Onorab letan nou ti pe premye diskisyon ki nou ti fer avek nou bann *DAs* nou, nou ti dir avek zot donn nou detrwa dimoun dan zot distrik ki kapab fer sa bann louvraz. Me apre nou ti santi poudir *this is gonna be*, en pe sizestiv. Si mwan mon en *DA*, mon konn tel dimoun oubyen mon annan, i kapab annan lenfliyans konfli lentere.

So, sanmenm sa ki nou ti *go through the tender process*

kot nou ti dir tou dimoun prezan, mon krwar mon ti refer en lot kominikasyon anvoy tou. Enform, nou ti fer en *intention of interest* lo Nation e la nou ti dir ek tou dimoun, nenport ki vin kot nou anvoy zot aplikasyon, zot kotasyon kot nou. E sa ki nou'n fer.

Sorry.

HON AUDREY VIDOT

Zis en leklersisman Mr Speaker. Zot in fer li zis lo Nation, zot pa'n fer lavertisman lo televizyon?

CEO NSC MARC ARISSOL

Non, nou pa'n fer li avertisman lo televizyon.

HON AUDREY VIDOT

Petet sanmenm sa ki mon pe dir, i kapab annan ki ankor petet pa'n okouran.

CEO MARC ARISSOL

Pa'n okouran. *Ok*, nou a konsider sa dan le fitir. Mersi Onorab.

MR DEPUTY SPEAKER

Mersi. Nou ava bouz lo lot entervenan. Onorab Kelly Samynadin.

HON KELLY SAMYNADIN

Mersi Mr Speaker. Bonzour Minis, *PS* e tou dimoun a lekout.

Mon'n aprann atraver mon DA ki i annan en sityasyon kot *power washer* pa pe marse e Au Cap nou annan en kort ki'n ranpli avek gomon e par konsekan nou bann *sportsman* pa kapab servi sa facilite.

Mon kestyon i, kwa ki pe ganny fer pou kapab rektifye sa sityasyon pou nou bann *sportsman* kapab *resume* zot bann *training*, zot bann fonksyon lo nou kort? Mersi.

MR DEPUTY SPEAKER

Mersi Onorab. CEO.

CEO MARC ARISSOL

Ok mersi Onorab pou ou kestyon. *Power washer* kot nou ki pa marse, oubyen dan zot distrik? Mon pa'n ganny ou klarifye.

MR DEPUTY SPEAKER

Wi.

HON KELLY SAMYNADIN

Wi nou napa *power washer* dan distrik, so atraver lyezon ki mon DA in fer avek NSC se sa ki'n ganny dir. *Thank you.*

CEO MARC ARISSOL

Sa ki'n ganny dir. *Anyway* nou a sey regarde. Parey mon dir ou, ler i koumsa la i en pe difisil pou nou. Akoz la nou pou bezwen al rod en dimoun pou nou donn en Kontra ki nou ti'n kapab fer sa, en

dimoun ki pe ganny peye lo nou *payroll* i zis ale. Me nou a regarde ki nou pou fer.

Parey nou'n dir zot i annan en kontrent bidzeter. Be selman nou a sey regarde, akoz i napa zis ou distrik ki mon ganny *call* tou lazournen i annan tou distrik. Me *we try our best* avek resours limite ki nou annan. Ok, mersi pou konpran.

MR DEPUTY SPEAKER

Mersi CEO. Be lefet ki in lo radyo ek televizyon la, en dimoun Au Cap ki annan en *power washer*, silvouple ed zot Ladministrasyon Distrik. Onorab Loze *you are next*.

HON JOHAN LOZE

Mersi Mr Speaker. Fatak in ariv oter en pti bef, pe rod *power washer*.

Minis mon ti pe get avek ou. Vi, si posib pou ou *meet* avek bann lezot *stakeholders*. Pou fer kler sa ki CEO in dir la, ki sa zafer dormi dan *locker room*. En fason ki bann lezot zofisyen dan distrik, zot pa ava pran lakle pou donn dimoun pou dormi dan *locker room*, so tou dimoun i ava lo menm paz avek zot e sa bann pratik ava ganny eliminé.

Akoz sa zafer sa problem dormi dan *locker room* la, lakle ti ganny donnen. Mersi Mr Speaker.

MR DEPUTY SPEAKER

Mersi. *Panel, Minister* oule reponn sa kestyon?

MINISTER MARIE-CELINE ZIALOR

Wi mersi Mr Speaker. Mr Speaker, mon pou parey mon kontan fer dan Lasanble donn en lapel Lasanble pou nenport ki Manm Onorab Lasanble ouswa piblik ki a lekout, ler i annan bann aksyon parey ki bann dimoun pe kas prosedir vvol Lalwa, anmenn kot NSC, anmenn kot Lotorite konsernen e nou, nou ava fer le neseser pou fer arete sa bann move pratik. Mersi Mr Speaker.

MR DEPUTY SPEAKER

Mersi *Minister*. Mon krwar sa i en bon lapel ki ou'n fer. Dernyen manm, non. Onorab Loizeau nou ankor *within the* letan, ou ki *next* lo lalis.

HON JOHN HOAREAU

Mersi Mr Speaker. Mr Speaker, mon anvi demann Minis or CEO.

Parey ler i annan bann travay en pti konstriksyon, meton en rigol anmas serten delo ki pe koule, parey Bel Air i annan en travay. Kontrer mersi, i annan en travay ki'n ganny fer pou anmas en delo ki ti pe desann lo kort.

Me selman mwan mon pa satisfe avek, akoz rezon kot zot

in anmas sa delo pou al zete, i pe kre en lot problem lo sa miray semen. Eski ler i annan sa bann proze parey la, eski zot lyez avek SIA pou ganny ekspertiz bann enzenyer ? Ouswa zot annan zot prop dimoun ki zot travay avek pou sirtou lo sipervizyon pou fer sir ki sa travay i ganny fer byen? Mersi.

MR DEPUTY SPEAKER

Mersi Onorab. CEO.

CEO MARC ARISSOL

Onorab mersi pou ou kestyon. Letan, bann louvraz parey nou pran li koman bann *minor maintenance work* e normalman li i ganny fer par nou bann travayer kot nou.

Nou en pti pe *understaff*, nou an nou zis en *senior officer*. So, parfwa i kapab annan en ta louvraz ki'n donnen e mon aksepte petet kekfwa *monitoring* pa'n ganny fer. Me selman si, si i arive kot i santi en pti pe *overwhelmed* oubyen si i bezwen lekspertiz SIA i kapab fasilman demann lasistans.

Me selman annou mazin osi poudir SIA osi i ase okipe. Me selman still nou fer sa bann lyezon, me selman mwan mon ava konsider ou konsern e pou lavenir. Mersi.

MR DEPUTY SPEAKER

Mersi CEO. Dernyen Manm ki'n eksprim lentansyon pou entervenir lo sa kestyon i Onorab Cosgrow.

HON WALLACE COSGROW

Mersi Mr Speaker. Mr Speaker, ler mon'n ekout, annefe i byen mon'n pran laparol dernyen.

Ler mon'n ekout tou bann Manm, bann kestyon ki zot pe leve. Mon santi ki ou a krwar CEO sa zafer i *overwhelming*, i annan en kantite travay lo NSC e ki sa laranzman pa pe neseserman marse.

Avan bann fasilite sportif dan distrik ti ganny *manage*, zere, netwaye aranze, fer pti miray, fer pti isi, fer pti laba par Ladministrasyon Distrik dan en lespri pour ki distrik i vin *autonomous* dan en serten sans avek tou sa ki pe pase dan sa distrik.

Me eski i annan en, petet en zefor, en fason revwar keksoz? Akoz i klerman pa pe marse pou nou kapab rod bann solisyon tourn ver distrik pou fer keksoz petet mars pli byen dan lokalite, ki bann Manm Onorab i ava okouran ki pe pase *but at the same time* distrik i ava kapab pran *ownership*.

Akoz zot NSC zot ava konsantre lo sport nasyonal e an zeneral bouz sport pli

devan. Mersi bokou Mr Speaker.

MR DEPUTY SPEAKER

Mersi Onorab. Mon a envit Minister.

MINISTER MARIE-CELINE ZIALOR

Wi, Mr Speaker. Ler sa desizyon ti ganny pran se *Local Government* menm ki ti propoze ki zot pa pe kapab zere.

E avek bann restriktirasyon kot *Local Government* ki sa bann lenfrastriktir i retourne kot NSC pou nou kapab fer bann neseser bann model ki pou fer. Sa bann diskisyon pou revwar sa model ki pe ganny servi lo latab kot NSC, definitivman akoz nou osi nou pa satisfe avek ki mannyer bann travay pe ganny fer.

Me selman mon pa pou fer, nou pou retourne dan tradisyon. Mon krwar nou kapab servi teknolozi, mon krwar nou kapab servi dan en fason modern pou nou kapab zer sa bann lenfrastriktir.

I zis ki kapasite entern ki nou'n *struggle* en pti git avek ki nou pe aranze la e CEO pe travay lo en model ansanm avek *Local Government* pou nou kapab regarde ki mannyer sa i kapab ganny fer pli byen. Mersi Mr Speaker.

MR DEPUTY SPEAKER

Mersi Minister. In ariv ler aprezan pou nou pas lo lot kestyon. Sa i kestyon 145 e i dan non Onorab Philip Arissol.

HON PHILIP ARISSOL

Mersi Mr Speaker. Bonzour Mr Speaker, bonzour Minis avek ou delegasyon, tou koleg Onorab e tou dimoun ki pe swiv nou. Kestyon i lir koumsa.

Eski Minis i kapab dir Lasanble ki mezir spesifik ki Gouvernman pe prevwar e enplimante pou revitaliz e ranforsi tou bann programm sportif par lekip e bann programm sportif endividylel pou amelyor konpetisyon konpetitiv nou bann atlet e lekip lo nivo nasyonal e osi enternasyonal. Mersi.

MR DEPUTY SPEAKER

Mersi Onorab. Mon ava envit Minis pour son larepons.

MINISTER MARIE-CELINE ZIALOR

Mersi Mr Speaker. Mr Speaker pou revitaliz e ranforsi bann programm sportif i en demars ki Gouvernman atraver NSC i pa kapab fer li tousel. Diferan partner dan sa leko sistem sport i annan son rol pou zwe. Nou pe met bokou zefor pou amelyor relasyon travay ant tou bann partner pou amelyor kolaborasyon ki neseser pou

fer arive sa ki Onorab Arissol pe demande.

Nou osi antreprann sa bann mezir swivan kot NSC . Enn, ogmantasyon dan finansman pou programm sport pou asir, pou sipor neseser pou lantrennman, lekipman e deplasman bann konpetisyon aletranze.

Dezyenm, rod ban loportinite labours pou atlet talante pou siport zot lantrennman ek partisipasyon dan bann konpetisyon enternasyonal.

Devlop e siport programm spor debaz dan lekol pou ogmant partisipasyon dan diferan spor e kre en baz talan pli larz dan lekol segonder atraver pei par organiz bann konpetisyon lekol ki NSC in komans fer.

Katriyenm, siport partisipasyon dan Konpetisyon Enternasyonal sirtou nou bann zenn atlet e la nou annan detrwa la ki'n partisipe parey Thiery Payet e Aaliyah Palestini dan natasyon e tou lede zot lo programm onivo.

Devlop servis sport swen ki nou apel *sports medicine* an Angle. Servis psikolog e servis reabilitasyon pou asire ki atlet i gard zot lasante lo pli o novo posib e met plis lanfaz lo prevansyon bann blessir.

Prepar programm nitrisyon sport avek spesyalis

dapre bezwen atlet pou amelyor zot performans e entrodwir e devlop programm spor lasyans *sports science* modern pou permet bann atlet ganny sertennman ki spesyalize osi dapre zot bann abilite.

Mon ti ava kontan Mr Speaker pour remersye zefor sa bann travayer e nou bann partner ki pe met en kantite travay pou refer nou bann programm sportif e mon bezwen rekonnnet zefor en kantite klib e bann lasosyasyon ki pe donn en koudmen pou relans *sports*. Mersi Mr Speaker.

MR DEPUTY SPEAKER

Mersi Minis pou larepons. Onorab Arissol i annan siplemanter.

HON PHILIP ARISSOL

Mersi Minis pou larepons byen detaye. Minis mon annan 2 pti kestyon, eski i annan okenn travay pou elev nivo osi bann lantrenner epi osi en travay pou fer avek nou bann *physical education teachers?*

E nou osi annan bann animator dan bann distrik ki travay avek *Local Government* si zot osi zot annan en lantrennman spesyal ki kapab enkli zot osi tou.

E Minis mon ti a kontan osi remersye ou e mon ti a kontan osi. Mon swe pou

Minister se ki nou bann lenfrastriktir sportif i pare boner pour ki nou bann lantrenner i kapab travay, enplimant zot bann programm pou nou annan zenn atlet ki pou partisip dan *CJSOI*. Mersi.

MR DEPUTY SPEAKER

Mersi Onorab. E alor *CEO* pou reponn ou kestyon.

CEO MARC ARISSOL

Mersi Deputy Speaker. Mersi Onorab pou ou kestyon. Onorab lo kote *coaching* nou annan nou en *Coaches Commissioner* kot NSC.

E ler ou pe koz *training* nou pe, sa dimoun i annan, sa *Commissioner* i annan son plan lo ki mannyer akoz sa i en keksoz ki nou'n an diskisyon avek zot pou donn en pe plis *training*. Akoz nou santi nivo *coaching*, bann *training* Sesel i en pti pe ba.

So, i annan dimoun ki annan parey ou menm, serten nivo enternasyonal. Me selman nou ti kapab ouver sa laport pou plizyer bann lezot *training* pou zot. I malere, pa tro lontan nou'n sorti nou'n al *Russia*. Nou'n ganny serten *courses online* e nou'n dir avek bann federasyon pou sa bann *course* ki *available* me selman nou pa'n vwar personn ki'n vin devan pou sa.

So, parfwa nou fer nou zefor me nou vwar poudir

federasyon osi fodre i travay ek nou en pti pe pli pros. *Ok.*

Lo kote animator nou annan nou'n *re bridge the gap* ant nou avek *Local Government*. Nou'n santi poudir letan i annan *the gap*, toultan prezan ou ganny sa *blame game*. So, nou'n fer sa ansanm avek federasyon pa tro lontan dan nou *forum* e nou'n osi fer sa ek *Local Government*.

E la i annan seksyon committee sport, Mr Remie ki responsab. I pe travay avek bann animator. I annan boul ki i pe al donn dan bann distrik pou *revamp* en pe, pou donn zot en pe lekspertiz lo ki mannyer pou *run* bann klib sport dan distrik. Mersi.

MR DEPUTY SPEAKER

Mersi. Minis i oule azout keksoz lo sa larepons.

MINISTER MARIE-CELINE ZIALOR

Mersi Mr Speaker. Zis lo kote lenfrastriktir pou atan pou *CJSOI*. Definitivman ou kapab garanti Lasanble Mr Speaker ki tou zefor, tou letour nou *monitor* ansanm avek *SIA* tou bann lenfrastriktir ki nou bezwen met onivo.

E mon bezwen dir Mr Speaker, travay i la. I bokou travay akoz an mezir toulezour bann *expert* ki dan pei la aktyelman mon pe koz la

spesifikman Stad Linite, ki anmezir ki ou vvar ki mannyer bann keksoz in mal ganny fer kot prezan nou bezwen *either* rod plis larzan pou fer li byen ouswa pou pran plis letan pou nou kapab fer li byen lo en nivo standar enternasyonal.

Me selman nou devoue e nou fer tou posib toulezour pou nou kapab e nou garanti poudir byento nou pou ganny nou bann fasilite pou nou bann atlet kapab *train*. Mersi Mr Speaker.

MR DEPUTY SPEAKER

Mersi Minis. Prosennman lo lalis, Manm ki premye pou lev lanmen pou siplemanter. Onorab Labonte.

HON ANDY LABONTE

Mersi Mr Speaker. Minis parey ou'n dir dan ou larepons, ler nou pe koz lo sport souvandfwa nou mazin zis Gouvernman. Wi Gouvernman i *partner* prensipal me i plito en akter koman en fasilitater.

Me an relasyon avek kestyon nou konnen ki aletranze i dan lemonn se plito bann dimoun ki dan biznes ki osi ede elev sport dan en pei, la mon mazin parey dan lepase bann dimoun parey Mr Carl Payet kot *Sunshine Car*, Mr Hughes Hoareau kot *Swim Blue* e bokou lezot ankor ki'n ede elev serten disiplin dan

Sesel malgre ki zot pa'n zanmen ganny montre lapresyasyon.

Alors, eski i annan bann demars pou ankouraz plis bann dimoun ki dan biznes vini antre e donn sipor pou ede elev nivo sport dan Sesel? Mersi Minis.

MR DEPUTY SPEAKER

Mersi Onorab. Mon ava envit CEO ki pou reponn.

CEO MARC ARISSOL

Onorab mersi pou ou kestyon. Nou ti komans en demars pou nou annan bann *donor's forum*, ok. Ki i pa'n tro, tro 100poursan.

Rezondet nou'n etablir, nou'n fer evalyasyon pou rode akoz sa pa'n marse. Se ki bann biznesmenn ek bann dimoun ki *sponsor* i ti a kontan ganny en benefis ki i normal. E la dan nou *forum* ki nou'n fer avek tou bann federasyon pa tro lontan, nou'n anmenn *CEPS on board* e *CEPS* li i pe osi donn nou sa ki nou apel en *charity certificate* ok, sa i pou sport.

So, therefore la ki nou pe fer, nou pou annan diskisyon avek *CEPS* pou nou kapab fer parey en *fair* kot nou a *market* sa en pti pe avek bann federasyon e osi sansibiliz bann biznes lo bann benefis ki zot gannyen letan zot pou *sponsor sport*.

E sa ki nou vvar ki pret nou devret al dan sa direksyon, en pe plis lenformasyon.

Akoz avan sa nou ti annan sa CSR, tou dimoun ti konnen. Me i paret mwan *charity certificate* dimoun pa'n tro okouran lo la. So, sanmenm sa ki nou pe travay ansanm avek zot pou nou kapab fer en pe plis piblisite lo la. Mersi Mr Speaker.

MR DEPUTY SPEAKER

Mersi CEO. Onorab Pillay *you are next on the list*.

HON SEBASTIEN PILLAY

Mersi Mr Speaker. Bonn apre midi tou dimoun. Bonzour, mon krwar i ankor bonzour Minis ek ou delegasyon e tou Manm Onorab e tou dimoun ki pe swiv nou.

Mr Speaker, mon pe ekout bann lapant kestyon depi ler bann kestyon pe ganny demande. Mon vvar pour i annan pa mal problem e konsern. E nou still ankor tann leskiz ki keksoz in ganny mal fer dan lepase, isi laba, isi laba.

Be kestyon, i pa pou rezourd kot nou ete ozordi. Eski Minis pe konsidere revwar modalite *manage* sport ki li in vin avek depi ler in antre Minis?

Ozordi kot nou annan Konsey Nasyonal pou Sport,

nou napa en konsey e sa i reponn direk ek Minis pour ki ou ava annan en pe plis divizyon zefor e ou ava anmenn lezot dimoun ki a kapab *share* en pe sa *burden manage sport*. Petet ou a ganny *basketball*, ou a ganny *volleyball*.

Akoz mon kot mon pe asize mon pe gete, ler mon'n koz avek en kantite dimoun i pa paret sa ki ou pe dir nou ou pe materyalize dan bann zefor tanzib sa pa en refleksyon lo ou. Me eski ou pare pou rekonsider modalite ki ou pe servi?

Akoz i kler i pa pe anmenn rezulta. Nou annan problemm avek *manage resours*, *pressure washer* napa Au Cap, se pa mwan konbyen letan.

MR DEPUTY SPEAKER

Onorab ou'n fini fer le pwen.

HON SEBASTIEN PILLAY

So, konmsi.

MR DEPUTY SPEAKER

Ou'n fini fer le pwen. *You should not use question time to make political or personal argument with the panel. The question is, eski Minis i pare pou revwar the modalite ouswa striktir management sport sa, that's the question, that's all.* Mersi.

Mon pe envit *panel* pou reponn. Mersi.

MINISTER MARIE-CELINE ZIALOR

Mersi Mr Speaker. Mr Speaker, mon abitye ek sa mwan. Sak fwa mon vin la pa manke lokazyon.

Wi, mwan mon pare pou mwan revwar nenport keksoz ki nou santi i pa pe marse e nou, nou ankouraz toulstan bann dimoun ki vin avek en plan serye avek levidans son *commitment* serye pou donn nou en koudmen.

Bann alegasyon naryen pa pe marse, bann lopinyon naryen pa pe marse san levidans Mr Speaker nou pa pou okipe. Akoz mwan mon krwar nou bezwen met nou resours ek nou lenerzi dan bann keksoz ki tanzib kot nou kapab vwar.

Mon'n mansyonnaen apepre en 8 keksoz ki pe ganny fer kot NSC e mon konnen poudir definitivman li Lopozisyon pou swazir pou li pa ekout sa bann, akoz sa bann pa dan son faver e modalite *manage sport* ek NSC napa modalite mon pa konnen akoz i krwar kekfwa petet ki mwan mon kontrol tou keksoz.

NSC i annan son *management* tim avek son plan, son 5 stratezi ki i fer marse, ki i evalye e i anmenn

bann keksoz ki tanzib, tanzib ki annan.

Mon ava envit *Leader Lopozisyon* Mr Speaker, letan Lasanble i vini ozordi desann en pti tour Roche Caiman. Pran en kou bann *video* ki'n annan dan sa bann avan 2020 avek la. Travay entansif ki pe fer lo tou sa bann lenfrastruktir ki i pe fer.

Wi, ou konnen akoz i pe pran bokou letan Mr Speaker. Akoz en lenfrastruktir ki depi 15an pase, 15an pase ti'n sipoze ganny fer.

(APPLAUSE)

MINISTER MARIE-CELINE ZIALOR

Mon ti ava vvar Mr Speaker ki i ti a dir sa Minis 15an pase sanz son modalite pour ki ozordi, ozordi mon ti a zwenn en lenfrastruktir ki ti lo en nivo ki nou ti aprezan zis renove. E ti ava annan enn, tousala pa'n fer. Sa i fe, pa lopinyon sa. I fe. E lekel ki pe fer Mr Speaker? Nou ki pe fer.

(APPLAUSE)

MINISTER MARIE-CELINE ZIALOR

E byensir nou pou annan bann lopinyon pou sey. Sa bann lopinyon la, pe sey anbet dimoun pou fer krwar ki naryen pa pe fer. Levidans ki konte Mr Speaker. Mersi.

MR DEPUTY SPEAKER

Mersi *Minister*. Prosennman lo lalis se Onorab Richard Labrosse.

HON RICHARD LABROSSE

Mersi Mr Speaker. Minis mwan ler mon pe regard sa kestyon li menm. Minis, ler mon pe regard sa kestyon li menm, i pe koz lo ankadre nou bann tim sportif pou zot kapab *compete* lo nivo nasional ek internasional.

Minis an se moman Sesel nou konnen i annan en ta konpetisyon ki nou'n partisip ladan e byensir la mon konnen i annan enn ki pe vini tre byento, *beach soccer*.

Kekfwa Mr Speaker, si ou ti ava permet Minis kekfwa pou eksplik Lasanble ki mannyer nou ete an preparasyon pou sa levennman ler nou pe koz lo nivo internasional? Mersi.

MR DEPUTY SPEAKER

Mersi Onorab. Ou pres pou al an deor scope, me lefet ki.

(Interruption)

MR DEPUTY SPEAKER

Mon'n vvar i annan en zafer la lo nivo nasional e osi internasional pou revitalize. Lopozisyon pa vin dir ek mwan ki mannyer mon pou fer mon

travay. Minis i ava reponn sa kestyon silvouple. Mersi.

(APPLAUSE)

MINISTER MARIE-CELINE ZIALOR

Mersi Mr Speaker. Mr Speaker, bann *beach soccer* i annan en *Local Organising Committee* ki Federasyon Foutbol ki *Chair* travay etrwatman avek nou avek departman avek NSC avek tou bann antite dan Gouvernman.

E i annan en kantite travay ki pe ganny fer sirtou pou regard avek SIA, bann lenfrastriktir ki bezwen vin ganny mete. Ki son bann demarkasyon, kote i pou ganny demarke tou.

E sa bann louvraz pe fer etrwatman ansanm avek nou sirtou avek SIA. En kantite louvraz avek Federasyon Foutbol pou regard sa e Federasyon Foutbol osi pe pran kont e zot in pran sarz *training* pou nou, nou tim nasyonal.

E kot Minister nou pe regarde prezan pou nou, bezwen *recruit* bann dimoun ki pou pe travay avek sa *Local Organising Committee* en pe deswit dan detrwa mwan. I annan aepre 5 post ki bezwen ganny *advertise* la pou nou *advertise* pou sa bann dimoun pran kont spesifikman apre. Akoz nou anvi angaz la

kominote Seselwa an antye dan sa demars *beach soccer*.

Me selman lo kote lenfrastriktir sa i pe ganny fer SIA etrwatman avek Federasyon Foutbol avek zofisyen FIFA pou bann demarkasyon ki bezwen ganny fer.

Me selman parey mon krwar Mr Speaker in dir, sa kestyon i a kapab ganny etablir petet pli tar. Mersi Mr Speaker.

MR DEPUTY SPEAKER

Mersi Minister. Dernyen Onorab ki'n eksprim lentansyon pou demann en siplemanter lo sa kestyon, Onorab Larue.

HON FLORY LARUE

Mersi Mr Speaker. Mr Speaker, mon ti a kontan demann Minis lefe ki nou pe koz lo amelyorasyon nivo konpetisyon dan bann konpetisyon nasyonal e enternasyonal. Nou vwar ki dan Bidze 2024 nou ti annan en alokasyon ki pe ganny fer pou CJSOI. Sa alokasyon pou ganny fer 2025 i R35.7milyon.

Ki mannyer sa sonm larzan pe ede pou kapab fer ki sa enn konpetisyon letan i vini lannen prosenn i a en pli o nivo? Mersi.

MR DEPUTY SPEAKER

Mersi. CEO ki pou reponn sa kestyon.

CEO MARC ARISSOL

Mersi bokou Onorab. Sa sonm larzan ki nou'n mete i pa zis pou preparasyon, parey nou konnen tou bann zwe i annan sa laspe preparasyon avek partisipasyon.

Me nou pou an 3 konponan se preparasyon, partisipasyon avek *host*. Savedir nou ki pe *host* savedir tou bann akomodasyon lozistik eksetera i pou form parti sa sonm larzan *ok*.

Pour le moman nou pe sey fer nou mye, akoz mon osi mon en pti pe konsernen lo *paste* akoz nou bezwen donn nou bann atlet ase letan pou zot kapab *train* pou sa *game* lannen prosen.

So, nou pe espere ki nou bann lenfra striktir i a pare *on time* pou nou kapab donn zot *enough time* pou nou kapab perform, Onorab. Mersi.

MR DEPUTY SPEAKER

Mersi CEO. In ariv ler aprezan pou nou pas lo lot kestyon sa i kestyon 146, i dan non Onorab Wavel Woodcock.

HON WAVEL WOODCOCK

Mersi Mr Speaker. Bonzour Minis, CEO, mon kestyon i *comme swivan*.

Eski Minis i kapab enform Lasanble ki bann

travay renovasyon ki NSC pou antreprann lo bann diferan fasilite sport lo Praslin pou lannen 2024? Mersi.

MR DEPUTY SPEAKER

Mersi Onorab. Mon ava envit *Minister* pou larepons.

MINISTER MARIE-CELINE ZIALOR

Mersi Mr Speaker. Mr Speaker, pou sa lannen nou a pe donn priyore dan Bidze pou fer renovasyon lo fasilite *watersports* ki lo Praslin.

Sa i pli gro travay renovasyon ki NSC pou antreprann lo Praslin e mon a profite ankor Mr Speaker, i en lot renovasyon ki nou bezwen fer ki pandan en ta lannen pa'n ganny fer. Kontan, pa kontan. Laverite.

Nou bann atlet sport lo delo Pralinwa pou en kantite lannen pe demann NSC pou aranz sa fasilite e mon rapel letan mon ti fek vin Minis, mon'n mont Praslin 2020 ansanm avek Onorab Woodcock nou'n pase e i ti enplore poudir silvouple annou fer sa pou nou bann atlet Praslin pou aranz sa fasilite.

Mon kontan pou anonse Mr Speaker, dan son totalite renovasyon pe al ganny fer sa lannen e i annan en kantite zenn ki frekant sa landrwa. Montre gran lentere dan sport

lo delo e pa blye Praslin i annan bokou talan, bann atlet sport lo delo e zot toultan fer tre byen e anmenn bon rezulta.

Mon anvi dir zot kontinyen, felisitasyon e byento zot pou ganny zot fasilite sportif ki renovasyon pou'n fer lo la an totalite.

Mr Speaker, i osi annan bann lezot renovasyon dan pli pti lanpler ki dan plan pou 2024 e avek ou permision mon ti ava swete ki CEO i donn en pti pe plis leksplikasyon. Mersi.

MR DEPUTY SPEAKER

Mersi Minister. Savedir CEO pou azout lo sa kestyon, larepons inisyal? So proceed CEO.

CEO MARC ARISSOL

Ok avan ki mon al lo sa bann lalis mon ti a kontan petet fer resorti en pti keksoz pou fer en pe, pou anmenn en pe plis laklerte lo zil.

Mon krwar mon fer detrwa vizit lo sa bann zil e sak fwa ki mon'n monte in annan konsern. Konmsi ou a krwar ki bann dimoun lo zil i dir poudir nou, nou get zis Mahe, nou pa get Praslin ek La Digue.

Me nou, nou pe sey fer nou mye ki sa nou kapab *breach the gap* ant e ki en zour nou kapab fer bann konpetisyon osi Praslin ek La

Digue, fer dimoun Mahe monte.

Me zis pou met zot dan portre, mazorite bann proze ki nou bezwen fer i bann *major capital project* e nou bezwen prioyitize akoz zot konnen CJSOI pe vini lannen prosenn. So nou bezwen fer sir ki bann lenfrastruktir Mahe i alaoter kot sa zwe pou ganny fer.

So, sanmenm sa nou'n prioritize. So, nou pa'n blyi zot lo zil nou. Nou okouran zot bann sityasyon akoz toulezour mon ganny diferan *call*. So, nou bezwen mazinen nou bezwen mazin prioyrite. *Ok*, so me par kont bann pti *minor project* nou pe seye.

Mon a donn en legzanp. Nou'n ganny en *call* pa tro lontan avek Federasyon Bokse pe dir mon zot in ganny zot *ring* in koule. *I mean* anler i koule, zot *ring* in defonse. So, ki nou'n fer? Nou'n sey rod en lot landrwa pou met zot. Nou ti'n ganny *allocate* avek kot *ex-STC warehouse*. Nou'n al gete, nou'n vizite. Nou vvar i pa pou *conducive* pou nou bann atlet.

So, nou'n dir be *ok* nou'n diskite menm. Pe rod solisyon menm. Nou'n pran bann vye tol ki nou'n santi. I pa bann, *well* bann tol ki'n deza ganny servi me selman ki ankor bon, mon krwar Onorab ou a konfirm sa. Nou'n rekouver antye sa landrwa e mon krwar

la Judo avek Bokse i ava kapab pli confortab.

So, i annan keksoz nou pe fer. Nou'n osi *paint changing room* kot Amitie, la nou pe al *paint bann toilet, ok*. Nou'n fer, tousala i bann zefor ki nou'n fer menm si i pa bann lenfrastriktir. Me selman nou'n fek anploy 2 bann *housekeeper* pou kit sa bann landrwa en pti pe pli prop, sa in ganny fer sa lannen. Ok.

Enstalasyon bann *fan* dan *changing room* in ganny fer. Nou annan 2 *fan industrial* ki nou'n mete, *installation of fire hydrant* kot Amitie nou'n fer, nou'n osi lo zil Eve nou'n *fix laponp* sa ti premye faz. Nou'n *fix laponp* pou *swimming pool*, pe mars tre byen.

E dezyenm faz pou kontinyen *next semester* e nou'n osi ranplas bann *tiles* lo *deck* ki ti'n mate, so tousala nou'n rektifye. So, sa i en pe bann proze ki nou'n fer. Pa bokou, me selman nou pe sey fer li *ok*. Mersi.

MR DEPUTY SPEAKER

Mersi CEO. Onorab Woodcock ou annan siplemanter?

HON WAVEL WOODCOCK

Mersi Mr Speaker. Minis mon *welcome* sa bon nouvel ki en renovasyon konpreansiv pe al ganny fer li sa *Water Sport*

Centre. Bann atlet *water sport* pou byen apresye sa.

Mon pou osi profite Mr Speaker pou remersye CEO ki apre zis en kout telefonn apre sa sityasyon kot nou fer *Judo* e laboks deswit in bouz lo la, in nobou kapab ganny kontrakter pou vin fer sa travay *maintenance* ki *at least* sa landrwa pa koule.

Me parey Minis in dir Mr Speaker, kontrent nasyonalman menm ki nou'n vwar dan en vizit ki *MYCC* in fer e lannen pase nou'n fer lo Praslin, se problemm avek leta bann facilite ki i pou bokou lannen napa okenn amenazman renovasyon ki'n ganny fer lo la. E sa i enkli bann facilite lo Praslin parey kot laplenn Grand Anse, en facilite ki pli vye ki mon Mr Speaker, ki napa preske ditou travay ki'n ganny fer lo la.

Water Sport Centre e menm sa laplenn osi ki i osi dan move leta. *Fencing* pe tonbe e menm Stad Linite, la fason ki sa drenaz- Stad Linite- eskiz mwan. Stad Amitie, la fason ki sa drenaz in ganny fer, son *fencing*. Tousala sa bann barikad, tousala leta i vreman dan bann move kondisyon ki demann en amenazman total.

Mon konpran konstrent bidzeter, me eski. Mon kestyon, eski Minis in detay en plan konpreansif pou tou sa

bann facilite. Mon pe koz Stad Linite, mon pe koz laplenn ok ou'n mansyonn mon *Water Sport Centre* e osi *going forward* pou enkli osi bann novo facilite osi ki pou ed bann atlet lo Praslin *going forward* pou le fitir? Mersi.

MR DEPUTY SPEAKER

Mersi Onorab. *Minister.*

MINISTER MARIE-CELINE ZIALOR

Wi, mersi Mr Speaker. Definitivman plan konpreansiv in ganny fer ansanm avek Minister Finans e avek SIA e nou annan miting regilye kot nou osi bezwen reprioritize nou reprioritize. Si fodre nou regarde pou nou akseler bann louvraz, nou akseler bann louvraz e pour tou, tou nou bann facilite i annan en plan konpreansiv, pou sa bann lannen ki pe vini osi tou.

E la nou pe fer plan konpreansiv, nou'n komans fer miting kot NSC pou pa zis fer plan renovasyon. Fer son plan *maintenance* dan le fitir pou ki nou pa vwar nou ankor dan sa sityasyon kot nou ete la ki nou pa fer renovasyon lo bann lenfrastruktir apre letan in ariv la kantite lannen parey, mon pou kontinyen repet Stad Linite akoz sa i en fe ki 15an apre ki son *lifespan* in fini, naryen pa'n ganny fer lo la.

E definitivman ou bezwen pran plis letan akoz domaz ki ganny fer avek en lenfrastruktir ki son letan, son *lifespan* in depas en kantite e plan pa'n zanmen ganny fer met dan Bidze pou aranz li, pou tou sa kantite lannen e i pa zis enn. I tou sa bann lenfrastruktir nasyonal ki nou'n annan Mr Speaker.

Nou'n bezwen fer plan e nou pe fer plan osi tou. Pe al pli lwen, fer plan *maintenance* ler nou'n fini met zot lo standar. Mersi Mr Speaker.

MR DEPUTY SPEAKER

Mersi *Minister.* Onorab Pillay. Wi.

HON SEBASTIEN PILLAY

Mersi Mr Speaker. Mr Speaker, sa ki mon pe tande en move zouvriye i toultan blanm son zouti. Kestyon in dir ek Minis koumsa poudir sa bann facilite in ganny fer i la ou sipoze annan ou plan *maintenance*.

Tou le term nou ganny kestyon ki revin demann ou *maintenance*. La sa ki fek koze avan mwan i fek koz lo *maintenance* ankor, i fek koz lo *maintenance* avan. Nenk i felisite menm.

So, kestyon pou ou. In demann ou en kestyon senp ou annan en plan konpreansiv? Wi, eski nou kapab vwar sa plan

konpreansiv pou nou regarde ki zistans ou'n arive avek sa plan konpreansiv. *That's all* ki nou pe rode. Mersi Mr Speaker.

MR DEPUTY SPEAKER

Minister.

MINISTER MARIE-CELINE ZIALOR

Wi Mr Speaker. Mon pa ti okouran ki *Leader Lopozisyon* pou dir mwanm mannyer mon pou reponn kestyon dan Lasanble.

Lenformasyon fodre nou donn dimoun, fodre pa nou kasyet laverite ek lenformasyon ki pou nou kapab donn bann dimoun e dan plas zis lopinyon. Fe avek lenformasyon plan, sa plan eski Mr Speaker, Mr Onorab Pillay i anvi en kopi napa problemm Mr Speaker nou kapab fer ganny lofis ganny sa plan konpreansiv.

Mon anvi ankor re eksplik ankor Mr Speaker, diferans ant renovasyon avek *maintenance* akoz i annan en diferans. Kekfwa zot pa'n konn la diferans, vwala akoz nou la ozordi. Mersi.

MR DEPUTY SPEAKER

Mersi. Next lo lalis se Onorab Porice ki'n endike. Demann kestyon.

HON DOYACE PORICE

Mersi Mr Speaker.

MR DEPUTY SPEAKER

Hold on, hold on. Point of Order, anba ki Order Onorab?

HON BERNARD GEORGES

Anba Order....

Lala mon *Point of Order*, lala mon *Point of Order*, Mr Speaker. Ki Onorab *Leader Lopozisyon* i pas tou son letan pe zis maltret Minis e pas tou sort komanter lo li.

I pa pe swiv mon ava dir ou Mr Speaker, i pa pe swiv *Order 36, content of question* e i pa pe swiv *Order 37, manner of asking questions*. Depi bomaten i pe fer sa Mr Speaker e mon ti'n lev lanmen pou *raise* en *Matter of Privilege* permet mwan *raise* li koman en *Point of Order* la akoz Speaker pa'n donn mon sa privilez bomaten pou *raise* mon *Point of Order*.

Onorab *Leader Lopozisyon* i pas tou son letan swa i demann en kestyon e ler respons pa favorab avek li i lager avek Minis. Oubyen parey i ti fer bomaten, i *raise* dan son kestyon. I met en keksoz ki pa vre e i fer sa pas koman laverite.

Bomaten in lev en papye devan nou pou montre la i la i pe fer ankor. Sa ki i pa realize, se ki ler i fer sa i bezwen sirkil sa papye avek nou tou bann

Manm akoz in servi en *prop.*
Sirkile nou ava vwar.

(APPLAUSE)

HON BERNARD GEORGES

Toultan i demann rankont apre selman li zanmen i rankont.

Bomaten zot in fer, in fer en mansonz dan son kestyon in dir ki ti annan *bodyguard* Prezidan ki ti dan lenz politik Sanmdi. Nou tou lo sa kote latab nou ti la e nou pa'n vwar enn e mon konnen ki ler i pou montre sa papye i napa lo la e i pou fwar avek li.

Nou nepli kapab Mr Speaker dan sa Lasanble annan en *Leader Lopozisyon* ki olye *lead Lopozisyon* i vin zis anmenn mansonz ek kalonmni devan sa Lasanble. Mersi bokou.

(APPLAUSE)

MR DEPUTY SPEAKER

Mersi Onorab. Mon bezwen *rule* lo sa *Point of Order*. Ou konnen, mwan sak fwa mon vin dan Chair mon ouver mon *Standing Orders* mon met devan mon lo *Order 36*, akoz nou *rules and regulations* anba *Standing Orders* i kler ki mannyer nou merit demann bann kestyon.

E wi i annan bann vyolasyon par egzanp *Order 36(1)(d)* ki ou pa kapab

anmenn lopinyon, largiman e souvan bann Manm i fer sa e menm dan 36(1) (1) i dir ou, ou bezwen *substantiate* keksoz ki ou dir.

Donk mwan mon pledwari pou *Rule* lo sa *Point of Order* se ki tou bann manm, tou kote latab i enportan nou konpran nou *Standing Orders*. Parske get sa, i parey mon ava servi legzanp foutbol bann dimoun akoz Sesel i popiler. I annan *rules*, si i dir ou pa tyonbo boul ek lanmen, ou pa kapab tyonbo boul dan milye laplenn tay avek. Si ou fer sa, nou menm nou, nou al kont nou bann *Standing Orders* nou pou kas standar ki nou sipoze pe *operate* anba la.

Donk mon ti ava enplor tou bann Manm pou silvouple, annou vin ofe avek nou *Standing Orders* e mentenir *the standard that is expected of us*. Mon annan.

(Interruption)

MR DEPUTY SPEAKER

Non. *Hold on, hold on, hold on* en pti moman. *Hold on, hold on.*

Ou konnen, wi i ou drwa pou ou demann en *Matter of Privilege*, ou'n leve. *Please go ahead.* Onorab Pillay.

HON SEBASTIEN PILLAY

Mersi Mr Speaker. Ou dan Chair ou'n donn en *ruling*,

mon pou respekte ou *ruling*. Me selman i annan *imputation* ki'n ganny fer as to mon louvraz koman *Leader Lopozisyon* e ki mannyer mon fer li.

Mr Speaker, mon oule met lo rikord ki sel dimoun ki annan drwa dir mon ki mannyer pou fer mon louvraz.

MR DEPUTY SPEAKER

Non, non, non *what is*. Ou'n lev en *Matter of Privilege*, savedir swa ou privilez ouswa privilez Lasanble in ganny afekte. So, *what is your privilege* ouswa privilez Lasanble ki'n ganny afekte?

HON SEBASTIEN PILLAY

Mersi Mr Speaker. Onorab Georges in *impute* en *improper motive towards* mwan e in dir poudir mon'n vin *mislead* Lasanble. Mon pou met sa portre ankor, mon pou donn li taler.

MR DEPUTY SPEAKER

Non, non.

HON SEBASTIEN PILLAY

Ki sa portre i montre Speaker Mancienne.

MR DEPUTY SPEAKER

Mon ava demann. *Hold on, hold on!*

HON SEBASTIEN PILLAY

Onorab Kelly Samynadin.

MR DEPUTY SPEAKER

Hold on. Mon ava demann *Hansard Reporter* pou al sers sa papye pou mon vwar sa ki Onorab pe dir silvouple.

HON SEBASTIEN PILLAY

Ok, e sa i montre zot dan lasal a manze Lekol Au cap kot tou dimoun in ganny dir poudir nou pa sipoze fer politik dan bann lekol, sa i premye pwen.

Intteruption

HON SEBASTIEN PILLAY

Dezyenm pwen, dezyenm pwen. La i sirkiler Lafors Defans ki'n ganny issued.

Now, si Onorab Georges. Si Onorab Georges i annan problem avek lafason ki mwan mon fer mon travay, i tough i bezwen dil avek. Mon Dirizan Lopozisyon e mon annan mon louvraz pou mon fer.

Minis in dir ek mwan poudir, Minis in reponn mwan e in dir ek mwan poudir sanmenm rezon mon dan Lopozisyon ou pa'n dir naryen. Imsye Onorab Georges in dir mwan mon'n mank respe pou Minis, mon ti a kontan i prouve.

So, mon ti a kontan ou fer Onorab Georges retract son bann komanter ki mon krwar i malapropo towards mon e ki

Onorab Georges napa naryen pou li dir mon lo ki mannyer mon pou fer mon louvraz. Sel dimoun ki ava dir mon sa se dirizan *United Seychelles* oubyen *United Seychelles*. Mersi.

(APPLAUSE)

(Interruption)

MR DEPUTY SPEAKER

Mersi, mersi. Mersi. Ou'n raise en *Matter of Privilege*, mon pou bezwen *rule*. Letan ou privilez ki ou pe dir.

HON SEBASTIEN PILLAY

Pa donn li, non. I sirkil ek Lasanble akfer bezwen donn ou? Pa bezwen donn li naryen, donn Lasanble portre.

MR DEPUTY SPEAKER

Akoz ou mikro i *on silvouple*.

HON SEBASTIEN PILLAY

I'm sorry.

MR DEPUTY SPEAKER

Now, Onorab mon pa santi poudir ou privilez in ganny breach. I lopinyon en Manm ki'n ganny dir. Ki'n arive la. Depi bomaten letan mwan mon'n pran Chair 11er Lasanble in trankil ziske ler Onorab Pillay in antre lo kestyon 145.

Onorab Pillay, napa privilez pou ou ki'n ganny afekte. Bomaten ou'n dir avek

Minis revwar son stratezi ki mannyer i pe *manage sports*. *My ruling on your Matter of Privilege*, revwar en pti pe ou fason ki ou *manage that sit as Leader of the Opposition*.

(APPLAUSE)

MR DEPUTY SPEAKER

Ou koz en kantite *disruption, unnecessary disruption to the working of The National Assembly*.

E, Deputy Speaker ki pe koze Onorab Vidot. So, akoz mwan mon la, mon'n obzerve depi bomaten Lasanble ti trankil. So, in donn mwan en portre ki mon bezwen dir wi, sa portre in tire dan lasal a manze lekol Au Cap e mon lenformasyon i se ki Minister Ledikasyon in aprouv desizyon pou *Head Teacher* donn permisyon e dan sa portre napa okenn zofisyel militer ki dan liniform parti politik, napa.

(Interruption)

MR DEPUTY SPEAKER

So, nou fini lo la. Nou fini lo la. Ti napa en lot dokiman ki mon ti sipoze gannyen zis sa enn la? Ti annan zis enn? Ok, non.

Onorab Cosgrow ou pe lev *mat-* ou pa'n dan sa lesanz ditou. Ou non pa'n ganny mansyonnen Onorab Pillay

son non e son pozisyon in ganny nonmen pou ou pa ti ladan, so non.

Prosen Manm ki lo mon lalis pou kestyon siplemanter lo kestyon 145 i Onorab Doyace Porice. *Proceed silvouple.*

HON DOYACE PORICE

Mersi Mr Speaker. Minis avek ou delegasyon, tou mon bann koleg Onorab bonn apre midi.

Minis mersi. Ou avek ou lekip pou fer sa bann zoli travay lo sa bann lenfrastruktir spor ki ti'n ganny, nou konnen nou menm. Akoz mwan mon aker pou spor, tou dilon mon lavi mon'n partisip dan *sport*.

Minis eski dan ou plan Minister pe osi mazin revwar sa 2 kort e lapenn Baie Sainte Anne? Mersi.

MR DEPUTY SPEAKER

Mersi Onorab. CEO pou reponn.

CEO MARC ARISSOL

Mersi pou ou kestyon Onorab. Parey mon'n, dir tou keksoz i baz lo en *priority*, nou bezwen prioritize. Sa i ava keksoz ki nou ava konsidere pa petet sa lannen me lannen prosen *ok*. Mersi.

MR DEPUTY SPEAKER

Mersi CEO. Prosen Manm ki lo mon lalis pou kestyon se Onorab Spiro.

HON RACHEL SPIRO

Mersi Mr Speaker. Minis mwan mon ti a zis kontan, mon'n fer sa vizit koman en Manm tou dernyerman dan komite e mon vwar lenfrastruktir i ankor en pti pe, kantmenm pa zis pou Praslin, Mahe osi.

E mon pe zis demande nou pe koz zwe CJSOI, me eski pou zwe sport atletik ki nou abitye fer an Zen, eski i pou annan lenfrastruktir pare pou bann sportsmen fitir ki pe vini kapab fer zot sanpyonna? Mersi.

MR DEPUTY SPEAKER

Mersi. Minister.

MINISTER MARIE-CELINE ZIALOR

Mersi Mr Speaker. Mon krwar petet Onorab pe demann Sanpyonna Nasional Atletik ki pou fer tou le lannen. Nou pa krwar ki i pou kapab fer an Zen la, me selman sa lannen wi, avek Ledikasyon nou pou fer Sanpyonna Atletik Stad Linite.

Rezon kekfwa letan ou'n vwar i byen ki ou'n al regarde ou vwar bann difikilte ki nou pe gannyen se akoz bann teknisyen in vini dan pei, zot vini zot pe travay apre ki nou'n bezwen refer sa baz sa *base* net akoz ti napa. sa en fe sa, teknisyen ki pe dir ek nou.

Ler zot in revin dan pei la zot in vwar nou'n fer akselere pou fer zot *GOP* pou zot vini vitman, ler zot in vini, zot in vwar poudir ankor sa laplenn sa *track* la enkli tou sa bann larestan *field event* lo sa laplenn i pa *IAAF standard*.

Savedir si ou pou fer okenn, okenn *time* lo la, nenport kwa pou kalifikasyon ou pa pou kapab e zot in demann nou eski nou bezwen aranze e zot in mezire i ti en pti pe tord, tord tou. Nou'n bezwen pran letan ankor pou zot refer sa bann travay, refer li pli byen e fer sir.

Vwala ki nou pe fer, nou pa pe blanmen. Nou pe donn fe e nou pe fer sir ki nou responsabilite nou fer li *IAAF standard*, premye fwa Sesel. Mersi Mr Speaker.

MR DEPUTY SPEAKER

Mersi Minister. Sa ti dernyen Manm ki ti'n endike zot oule demann en kestyion lo sa size.

Non, napa *Point of Order* nou'n repran nou sesyon kestyion, tou bann keksoz pe deroul byen ziska prezan napa okenn enteripsyon ki'n arrive.

Aprezan dernyen *item* lo nou *Order Paper* bomaten se en *Question Without Notice* anba *Order 33* pou Minis Lazenes, Sport avek Lafanmir Mrs Marie-Celine Zialor e sa kestyion i dan non Onorab Sylvanne Lemiel. Mon ava

envit Onorab pou pran laparol silvouple. Mersi.

HON SYLVANNE LEMIEL

Mersi Mr Speaker. Mr Speaker, mon kestyion i al *comme swivan*.

Eski Minis i kapab donn en kontrandi sa Lasanble e osi zabitan Anse Royale ki pe arive avek proze Anse Royale *Sports Complex*? Mersi.

MR DEPUTY SPEAKER

Mersi Onorab. Mon ava envit Minister pou reponn silvouple.

MINISTER MARIE-CELINE ZIALOR

Mersi Mr Speaker. Mr Speaker, bann proze lenfrastriktir Anse Royale ki nou pe antreprann pe kontinyen sa lannen. Premye faz proze kot *Olympia House* in fini, renovasyon in ganny fer lo bann twalet, *changing room* e osi i annan travay in ganny fer pou donn plizyer akse diferan disiplin ki pe servi sa facilite pou kapab bouze san *disturb* kanmarad.

Lakonpannyen Mekra ki met sifas lo *tennis court* pe vin dan pei lafen Zen la pou fer renovasyon kort tenis Roche Caiman prensipal e zot pou osi fer travay profite lo kort Anse Royale.

Renovasyon lo kort *handball* osi pe al komanse tre byento, nou ti pe esper

konsiltasyon avek Lasosyasyon *Handball* pou dir nou ki bann prosedir, bann demaraz pou fer pou zot kort.

Lazans Lenfrastriktir *SIA* pe fini finaliz *scope* renovasyon *building* ki an ros ki pou ganny servi pou bann sport konbativ karate, *judo*, laboks zot pe fini finalize la pou nou kapab komans sa travay e an sa ki konsern konstriksyon en nouvo *multi-purpose indoor complex* parey Palais de Sport.

Sa *MOU* in fini ganny sinyen avek Gouvernman *UAE* akoz sa i en donasyon e *SIA* pe travay lo son *scope* pou kapab regarde kan pou komans son premye faz. Mersi Mr Speaker.

MR DEPUTY SPEAKER

Mersi *Minister*. Onorab Lemiel ou annan siplemanter?

HON SYLVANNE LEMIEL

Mersi Mr Speaker. Mersi Minis pou ou larepons. Minis petet mon ti a kontan konnen kan ki sa *MOU* in sinyen avek Gouvernman *UAE* pou sa *Sports Complex*?

E osi mon konnen i annan en komite ki ti ganny etablir pou nou kapab konn bann lenformasyon Mr Speaker firamezir ki i annan bann devlopman ki pase an sa ki konsern sa *Sports Complex* e ki mwan osi ansanm ek *DA* nou form parti sa komite.

Me sa komite pou nou zwenn i bezwen Mrs Nibourette toulstan ki inisyen miting, mon ti a kontan petet konnen si koman Minis petet ti a bon nou revwar sa komite, met en dimoun responsab koman *Chairperson* e ki dezormen nou kapab ganny konsilte pli frekaman an sa ki konsern devlopman ki pe arive or ki pou arive lo sa *Sports Complex*.

Akoz i annan en bon 6 mwan mon krwar dernyen fwa nou ti zwenn ti lannen pase. kot ti annan ankor amannman ki ti sipoze ganny fer lo sa plan me ziska la nou *nowhere* pou nou konnen si wi in ganny amande, ki mannyer i ete prezant. Me par kont nou tande i annan en *MOU* ki'n sinyen.

Eski petet ou pou pran li ou responsabilite pou ou donn en direktiv, donn en *Chairperson of that Committee*? Akoz mon vwar tou keksoz i ganny *rely* lo Ms Nibourette. Mersi.

MR DEPUTY SPEAKER

Mersi Onorab. *Minister*.

MINISTER MARIE-CELINE ZIALOR

Mersi Mr Speaker. Mr Speaker *MOU* akoz i en donasyon sa i ganny fer avek Departman Finans ansanm avek *Foreign Affairs* pou sa avek *SIA*, e si Lasanble i anvi ganny en kopi

nou ava fer le neseser pou nou fer ganny en kopi sa *MOU* kan ti ganny sinyen.

E mon- i ti dan Nnouvel selman, i ti dan *Public Domain* letan sa ti ganny sinyen. Mon rapel kot ti ganny anonse pou enn de, menm bann diferan lenfrastruktir ki Gouvernman *UAE* pe donnent.

Kot i konsern ou dezyenm kestyon. Petet kekfwa mon'n mal konpran. Be selman la mon, akoz taler *Leader Lopozisyon* in dir mon kontrol tou keksoz mon menm, les avek larestan dimoun. La prezant ou pe dir ek mon donn en lord.

Ms Nibourette i ede avek kot mon lofis, li ki mon donn direktiv avek lofis pou regard bann lenfrastruktir nasyonal pou nou avanse ansanm avek *SIA*, ansanm avek bann larestan partner ki neseser pou bouze pou mon ganny lenformasyon.

Apre pou mon kapab regarde avek mon bann larestan Koleg Minis ki mannyer nou fer keksoz bouze, avanse.

Parfwa si lenformasyon selman mon pou les li avek permisyon Mr Speaker pou li eksplik en pti git petet sa Komite komunikasyon ki pe arive.

Si i ankor lo en nivo kot pe ganny diskite kot Konsey Minis, ouswa i annan i pa pou

arive byensir. Akoz nou a pe donn en kantite priyorite. Nou'n met lanfaz la lo *Palais de Sport*, Stad Linite sa bann kort tenis ki nou bezwen pou fer li la kot larzan in ganny bidzete, bann teknisyen in pare pou nou vini pou kapab bouze akoz i en pe Lazans ansanm.

E mon'n bezwen al ladan pou fer sa bann komunikasyon la pou nou kapab fer ki avanse. Me selman i pou vini li sa proze Mr Speaker, petet kekfwa sa bann komunikasyon ki pa ankor arriv sa nivo anba. Petet mon ava avek permisyon donn Ms Nibourette donn sans donn nou en pe plis lenformasyon si an ka nou'n manke. Mersi Mr Speaker.

MR DEPUTY SPEAKER

Mersi Minister. Mrs Nibourette ava azoute.

DG GYRA NIBOURETTE

Mersi Mr Deputy Speaker. Mersi Onorab pou ou kestyon. Onorab i vre i annan en pe letan diskisyon, komunikasyon avek nou komite in tonm en pe. Me selman sa osi in vin en pe akoz nou dimoun prensipal ki ti pe travay lo sa plan i pa la. Petet sanmenm sa ki'n mank en pe komunikasyon.

Me selman mon kontan pou dir poudir la avek Mekra ki pe antre e fini ganny sa

miting ki nou pou fer avek *handball* pou zot donn nou zot bann spesifikasyon oubyen ki SIA i kapab *capture* Komite pou ou pou vwar li en pti pe pli aktiv pou zot kapab ganny bann lenformasyon, bann *updated* lenformasyon.

Parey nou dernyen vizit ti pou annan sa bann pti amannman. Tousala in ganny pran an konsiderasyon pou fer sir ki nou ganny *parking*, nou ganny sa *ticket booth*. Konmsi tousala, sa ki nou ti diskite dernyen fwa in fini ganny dakor i pou dan sa plan ki pou vini. Mersi.

MR DEPUTY SPEAKER

Mersi Mrs Nibourette. Onorab Lemiel ou annan klarifikasiyon.

HON SYLVANNE LEMIEL

Mersi Mr Speaker. E pou finalman petet mon ti a kontan demann Minis si ou annan en *timeframe*, akoz ou'n dir mon byento i pe vini i pou vini, nou pe espere.

E donn mwan en *timeframe* si ou annan Minis, kan eski nou pe mazinen vwar en komansman petet apre ki sa bann eksper pou tennis in vini, *handball* in vini. Eski ou annan en nide kan nou pe mazin vwar e komansman sa proze? Mersi.

MR DEPUTY SPEAKER

Mersi Onorab. *Minister.*

MINISTER MARIE-CELINE ZIALOR

Mr Speaker, sa i en donasyon e avek donasyon nou pou bezwen atann avek tou bann prosedir diplomatik ki i ava ganny fer pa zis kot nou me selman kot *Foreign Affairs* avek Departman Finans osi avek son fason zesyon ki i kapab ganny fer.

E desito, mon konnen nou pe rod *timeframe*. Me selman desito, ki sa i ava e avan ler nou kapab fer sa nou pe esper SIA avek sa *scope*. Dek koman nou ganny en *scope* parey Ms Nibourette in dir, komite i ava ganny bann lenformasyon e desito ki nou'n pare avek nou ava kapab fer konnen kan ki nou pou kapab komanse. Mersi Mr Speaker.

MR DEPUTY SPEAKER

Mersi. Ou an klarifikasiyon Onorab?

HON SYLVANNE LEMIEL

Mr Speaker, wi mon pou annan dernyen. Minis mersi pou sa, me selman si mon pa tronpe Mr Speaker, dan Bidze ti annan 2 konponan larzan, en konponan pou *Foreign Grant* apre en konponan si mon pa tronpe en 4milyon or 3.5 milyon *local Grant- local funding*.

Petet mon ti a kontan konnen sa bout *local funding* i osi i pa ankor komanse mon krwar, ki pe arive ek sa bout pou *local funding*. Grant wi nou ankor pe espere, i en donasyon wi nou pou bezwen espere. Me sa bout lokal ki nou, nou ti'n sipoze komanse *what's happening? Thank you.*

MR DEPUTY SPEAKER

Mersi. Mrs Nibourette pou reponn sa.

DG GYRA NIBOURETTE

Mersi Mr Deputy Speaker. Mersi Onorab pou ou kestyon. Onorab i sanmenm sa ki nou pe al komanse la tre byento letan Mekra i antre dan pei, kot nou pou kapab komans depans sa 4.5milyon ki enkli sa *tennis court, handball* avek sa *building* ki nou dir sa *building* ros la.

Bann zofisye i sipoze lo teren pou zot kapab rewvar, konmsi ganny sa *design* parey *the concept* i ete pou zot kapab devlop sa *scope* pou nou kapab komans li. Mersi.

MR DEPUTY SPEAKER

Mersi Mrs Nibourette. Bon loter kestyon Manm Elekte pou distrik Anse Royale in byen epwiz son kestyon. Kestyon ti dan son non e *scope* i Anse Royale e nou konn bann presedans ki'n etablir avan nou pa donn kestyon

siplemanter lo *Question Without Notice.*

Donk nou pou remersi *panel* ki'n zwenn nou depi bomaten. *Panel* sorti kot Minister Lazenès, Sport avek Lafanmir dirize par Mrs Marie-Celine Zialor. I ti akonpannyen par Sef Egzekitiv Konsey Nasional pou Sport Mr Marc Arissol e osi Direkter Zeneral pou Resours Imen e Stratezi dan Minister Lazenès, Sport avek Lafanmir Mrs Gyra Nibourette.

Nou ava remersi zot pou avek nou e nou ava swet zot bonn kontinyasyon pou sa lazournen. Mersi.

Bann Manm Onorab i kapab note poudir in annan en *Revise Order Paper* ki'n sirkile dan *break* pli boner ozordi, sa i akoz i annan en *First Reading* pou en *Members Bill*. Donk mon ava envit Mrs Clerk pou fer *First Reading* silvouple.

MADAME CLERK

Mersi Mr Speaker. *This Act may be cited as the Constitution of the Republic of Seychelles 11th Amendment Act 2024 and shall be read together with the Constitution of the Republic of Seychelles cap 42 as amended which is herein after referred to as the Constitution.* Mersi Mr Speaker.

MR DEPUTY SPEAKER

Mersi Mrs Clerk. Nou pe apros lafen nou travay pou ozordi.

Bills Committee pe zwenn midi edmi zisteman pou konsider sa *Members Bill* ki Mrs Clerk in fek fer *First Reading*. ABC i sipoze zwenn demen dan en *extended meeting* e sa sekretarya an kolaborasyon avek Lofis Speaker i ava *advise* bann Manm keler nou pou fer si i a bomaten ouswa si i pou apre midi par ki Lasanble 9er edmi, *ok*.

Mon pa ankor vwar sa komunikasyon akoz mon telefonn pa avek mon kot mon resevwar mon bann komunikasyon.

Donk nou pa pe zwenn demen Lasanble e nou pa pe zwenn osi Mardi prosen akoz i en konze piblik le 18 i Zournen La Konstitisyon. Nou pou repran travay Merkredi prosen ki le 19 Zen.

Donk mon ava remersi zot pou zot partisipasyon ozordi e swet zot bonn kontinyasyon lazournen.
Mersi.

(Adjournment)